



C40
4514
(172)



9 170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8

C40-4514

了翁二座請大藏及有
家書置之武州紫雲山
我徵笑塔院后府中未
為學者不敢許出院內
當山二世鐵牛機謹誌



B 64853

密菴和尚語錄目錄

序文

卷上

往衢州西烏巨山乾明禪院語錄

衢州大中祥符禪寺語錄

建康府蔣山太平興國禪寺語錄

常州褒忠顯報華藏禪寺語錄

臨安府徑山興聖萬壽禪寺語錄

臨安府景德靈隱禪寺語錄

明州太白山天童景德禪寺語錄



支那

支那

卷下

小叅

普說

頌贊

偈頌

法語

目錄終

密菴禪師語錄序

密菴禪師示寂之三年其得法真子住靈巖了悟以
 老師平生語一編屬鐵作序鐵切謂老師一見應菴
 便明大法破沙盆語盛播叢林此無可序者七鎮名
 山道滿天下一時龍象盡出鉗鎚此亦無可序者入
 對

中宸闡揚般若深契

上意益光宗門此亦無可序者然鐵叨承衣付義不
 容默謹爲之序曰密菴語錄二卷總八十七板板二
 十行行二十字若於此薦得許親見密菴如或未然

撰述
密菴禪師語錄序
聽取一轉語淳熙十五年冬仲月九日叅學張鑑序

密菴和尚語錄卷上

住明州天童景德寺十七世孫圓悟編

衢州西烏巨山乾明禪院語錄

師於乾道三年八月初一日就本院受請陞座云適
來未鳴鼓已前喚作傑上座而今陞座已後喚作烏
巨長老驟爾更其名易其號披毛戴角拖犁拽杷向
異類中頭出頭沒旣然業債難逃只得歡喜忍受恁
麼見得徹去新長老出世事畢其或未然傑上座今
日失利 叙謝不錄

復舉三聖道我逢人則出出則不爲人興化道我逢

人則不出出則便爲人後來白雲端和尚拈云二尊宿各有一處打得著且道那個在前那個在後師召大衆云白雲端和尚錯下名言殊不知二尊宿前不至村後不迭店直至於今翻成話霸何故字經三寫烏焉成馬下座

入方丈據座云此室甚深廣大非語默可及淨名居士向遮裏寐語未惺七佛祖師到來納敗愈甚傑上座口似乞兒破席袋又如何施設喝一喝云不入洪波裏爭見弄潮人

八月二十二日就本院開堂拈香祝 聖罷復拈香

云此一瓣香收來久矣欲隱彌露今日人天普集不免從頭說破昔年行脚自江西回擬往四明方抵婺州智者却被傍觀兄弟錯指路頭撞入衢州明果山中見個老和尚列列挈挈太煞不近人情旣已將錯就錯禮了三拜直至於今悔之不及雖然如是寃有頭債有主熟向爐中供養末後住天童山第十八代應菴大和尚用酬法乳之恩遂歛衣就座問答罷乃云祖師心印狀似鐵牛之機去則印住住則印破森羅萬象明暗色空情與無情一印印定更無絲毫透漏更無絲毫歪作更無絲毫起滅更無絲毫動搖如

金博金似水洗水了絕異緣迥超諸有以此壽聖人
則天長地久以此祝賢守則伊尹周公以此安樂生
民以此康福天下以此播揚大教以此扶豎正宗然
雖如是且道印子卽今在什麼處良久擊拂子云鵬
弓高挂狼煙息萬國歌謠樂太平復舉保壽開堂三
聖推出一僧保壽便打三聖云與麼爲人瞎卻鎮州
一城人眼去在保壽擲下拄杖歸方丈師云二尊宿
美則美矣若要扶臨濟正宗每人各欠一頓棒在且
道那裏是他欠處具擇法眼者試定當看
上堂佛說一切法爲度一切心我無一切心何用一

切法旣無心又無法山河大地甚處得來見聞覺知
復是何物乃喝一喝云臨崖看潯眼特地一場愁
上堂一進一退一動一靜須信那伽常在定一擒一
縱一殺一活四方八面活鱗鱗嘉州大象喫鹽多陝
府鐵牛添得湯若作佛法商量喫鐵棒有日在
上堂知幻卽離不作方便以拂子左邊擊一下云向
遮裏薦取離幻卽覺亦無漸次以拂子右邊擊一下
云向遮裏薦取一人發真歸元十方虛空悉皆消殞
以拂子中間畫一畫云向遮裏薦取烏巨葛藤盡被
諸人覷破了也諸人鼻孔眼睛被烏巨拂子穿却因

什麼不覺不知其間或有一個半個驀地知非黑漆拄杖未放過在何故曹溪波浪如相似無限平人被陸沉

上堂僧問德山托鉢意旨如何師云無意旨進云因什麼托鉢下僧堂師云要行便行要坐便坐乃舉雪峯和尚示衆云盡大地撮來如粟米粒大拋向面前漆桶不會打鼓普請看師云遮老子三登投子九到洞山做盡計較末後却向鼇山店裏打箇没折合放聲道今日始是鼇山成道今日始是鼇山成道便將大地人物作自己受用致令千載之下凌辱宗風烏

巨與麼告報不是抑他雪峯且要天下衲僧向後各自有生涯莫總作遮野狐精見解喝一喝下座

聖節上堂摩訶衍法離四句絕百非諸佛說不到拂子善提持乃舉起拂子云還見麼以此祝 君壽壽算等須彌

上堂舉世尊在靈山會上五百比丘得四禪定具五神通未得法忍以宿命智通各自見過去殺害父母及諸重罪於自心內各各懷疑於甚深法不能證入文殊承佛神力遂手握利劍持逼如來世尊謂文殊曰住住不應作逆勿得害吾吾必被害爲善被害

文殊師利爾從本來無有我人內心起時我必被害
卽名爲害於是五百比丘自悟本心如夢如幻於夢
幻中無有我人乃至能生所生父母於是五百比丘
同讚歎曰文殊大智士深達法源底自手握利劍持
逼如來身如劍佛亦爾一相無有二無相無所生是
中云何殺師云爲人須爲徹殺人須見血文殊費盡
腕頭氣力要且不知此劍來處帶累釋迦老子通身
是口也分疎不下五百比丘恁麼悟去入地獄如箭
射忽若踏翻大海踢倒須彌雲門扇子踣跳上梵天
墜著帝釋鼻孔東海鯉魚打一棒兩似盆傾又作麼

生商量良久云自從舞得三臺後拍拍元來總是歌
上堂以楔出楔翻成途轍以心傳心轉見病深達磨
不會當頭句卻向嵩山面壁九年後代兒孫承虛接
響揚眉瞬目行棒行喝盡是黃葉止啼烏巨到遮裏
直得上天無路入地無門咬定呀關且與諸人和泥
合水卓拄杖一下云不是一番寒徹骨爭得梅花撲
鼻香下座

因雪上堂滿目紛紛呈瑞雪填溝塞壑誰辯別文殊
無處頭渾身普賢失卻真妙訣烏鴉變作白頭鴉鐵
樹翻成銀線結報諸人瞥不瞥庭際無人立片時便

是太平底時節喝一喝下座

上堂舉昔日有婆子供養一菴主經二十年常令一女子送飯結侍一日令女子抱定云正與麼時如何主云枯木倚寒巖三冬無煖氣女子歸舉似婆婆云我二十年只供養得個俗漢遂發起燒卻菴師云遮個公案叢林中少有拈提者傑上座裂破面皮不免納敗一上也要諸方簡點乃召大眾云遮婆子洞房深穩水泄不通偏向枯木上糝花寒巖中發焰個僧孤身迥慣入洪波等閑坐斷濈天潮到底身無涓滴水子細簡點將來敲枷打鎖則不無二人若是佛

法未夢見在烏巨與麼提持畢竟意歸何處良久云

一把線綵收不得和烟搭在玉欄干

上堂有物先天地無形本寂寥能爲萬象主不逐四時周且道是什麼物有般無鼻孔漢便是描也描不成畫也畫不就佛眼覷不見不識不知如斯理論正所謂一句合頭語萬劫繫驢橛烏巨有一則語非是扶宗豎教且要與天下衲僧剝盡貼肉汗衫諸人切須諦聽良久云匙好挑飯筯好筴菜叅

上堂舉僧問梁山家賊難防時如何山云識得不爲冤僧云識得後如何山云貶向無生國裏僧云莫是

撰述一

卷之九

五

支那

卷之九

六

撰述
卷之十一
六
他安身立命處也無山云歿水不藏龍僧云如何是
活水龍山云興雲不吐霧僧云忽然傾湫到嶽時如
何山下繩床把住云且莫濕著老僧袈裟角師召大
衆云梁山老賊慈悲太煞與賊過梯引入屋裏劫盡
家財攪吵一上不解勦絕他命根致令偷心不灰若
是烏巨則不然忽有問家賊難防時如何便與一刀
兩斷教他灑灑落落作一枚白拈賊到處偷營劫寨
驀拈拄杖云遮一隊賊漢來遮裏討什麼下座一時
趕散

上堂舉龐居士頌十方同聚會師云鐵壁銀山個個
學無爲師云日月昭臨此是選佛場師云龍蛇混雜
心空及第歸師云凡聖同居驀拈拄杖橫按云龐居
士在遮裏坐地是汝諸人還見麼遂擲下拄杖云三
生六十劫

上堂舉僧問雲門久雨不晴時如何雲門對道劄師
云大衆雲門一劄乾坤旬匝海水騰波須彌岌業驀
拈拄杖卓一卓云雲門大師向遮裏無出氣處且道
烏巨活人眼在什麼處復卓拄杖云久雨忽晴天清
地寧寒山撫掌拾得忻忻恁麼會得旱地遭釘
李侍郎入山上堂幽禽噪破那伽定便見文星入寺

來倒屣門迎笑面林泉陡覺起風雷風雷起處萬
壑生春正眼洞明十虛無間手攜仲尼日月腰佩佛
祖靈符在處爲瑞爲祥爲龜爲鑑牆壑法門股肱王
室不是神通妙用亦非法爾如然何謂如此自從踏
斷千差路便向毘盧頂上行

上堂卽心卽佛鐵牛無骨非心非佛空山突兀不是
心不是佛不是物人從陳州來却得許州信報道今
年蠶麥熟風雨時五穀豐萬民樂東村王老聞得嘻
嘻而歌曰從來不唱脫空歌把火燒山拾田螺 幣
樹頭魚扇子急水灘頭鳥作窠好大衆不是文章四

六亦非少室單傳哆哆和和如薦得祖師鼻孔一時
穿以拂子擊禪牀下座

上堂僧問大龍老倒放癡愁澗水山花錯指南堅固
法身無覓處千峯盤屈色如藍正與麼時如何師云
剔起眉毛直下薦取進云直得上無攀仰下絕已躬
師云畢竟向甚處安身立命進云平生心膽向人傾
師云猶在半途進云忽有問和尚色身敗壞如何是
堅固法身未審如何對他師云破草鞋進云處處綠
楊堪繫馬家家門裏透長安便禮拜師乃舉外道問
佛不問有言不問無言世尊良久外道讚嘆云世尊

撰述
大慈大悲開我迷雲令我得入師云黃面老子爲人
天師被外道輕輕問着便見七穿八穴外道不識好
惡更言大慈大悲開我迷雲令我得入正是夢中說
夢外道去後阿難問外道有何所證而言得入世尊
云如世良馬見鞭影而行師喝云向甚麼處去來黃
面老子當時若下得遮一喝兒孫未至掃土衆中莫
有爲黃面老子作主底麼出來與烏巨相見良久云
吽下座

上堂僧問有句無句如藤倚樹樹倒藤枯句歸何處
師豎起拂子云還見麼進云鷄子過新羅師云不如

禮拜好師乃云有句無句如藤倚樹石裂崖崩毒蛇
當路樹倒藤枯悉哩蘊瀉瀉山呵呵大笑和賊捉敗
了也且水不洗水一句作麼生道皇天無親唯德是

輔

國清直庵和尚到上堂雲開千嶂出木落一枝分相
見又無事不來還憶君 叙謝畢

復舉芙蓉和尚一日訪實性大師大師陞座以右手
拈拄杖倚左邊云此事若不是芙蓉師兄大難委悉
師召大衆云實性大師弄巧成拙鈍置他芙蓉師兄
今日國清師兄到來烏巨也不拈拄杖亦不與麼道

且道與古人是同是別良久云相逢自有知音知何
必清風動天地

上堂今朝六月十五祝 聖陞堂擊鼓木童火裡吹
笙石女雲中作舞也大竒也大竒天無四壁地絕八
維五湖四海來入貢衲僧聞見眼如眉喝一喝下座
解夏上堂僧問如何是正法眼師云草鞋無爽進云
只如和尚道破砂盆又作麼生師云老僧不會動着
舌頭進云此語已遍天下師云杓卜聽虛聲師乃云
烏巨今日解夏乃遵黃面老子二千年前話霸驗蠟
人徹底水清護戒珠了無縫罅惟有露柱燈籠不肯

入遮保社何故從來心似鐵端不受差排

病起上堂一葉飄空萬木秋飜思光景急川流若人
識得其中意坐斷千差向上頭山僧數日來似病不
病似安不安似死不死方丈裏撒尿撒尿大開眼狂
言寐語直是東西不辯南北不分求生不得求死不
得釋迦老子爲四生慈父三界醫王也覓此病起處
不得正當此時若人救得山僧點一盞薄荷湯與伊
濕口若救不得如人上山各自努力閻羅大王不是你
爺他時打你鬼骨臀索飯錢去在莫言不道

上堂天上月圓人間月半槌鼓陞堂理舊公案且作

麼生是舊公案車不橫推理無曲斷

上堂盡軋坤大地喚作一句子擔枷帶鎖不喚作一句子業識茫茫兩頭俱透脫淨裸裸赤灑灑沒可把達磨一宗掃土而盡所以雲門大師道盡乾坤大地無絲毫過患猶是轉句不見一色始是半提更須知有全提時節大小雲門劍去久矣方乃刻舟

上堂舉金峯和尚示衆云老僧二十年前有老婆心二十年前無老婆心時有僧出問如何是和尚二十年前有老婆心峯云問凡答凡問聖答聖僧云如何是二十年前無老婆心峯云問凡不答凡問聖不答

聖師云烏巨當時若見但冷咲兩聲這老漢忽若瞥地自然不墮聖凡窠臼

上堂世尊拈花勾賊破家迎葉微笑聲前失炤雪峯靦毬雙放雙收玄沙未徹眼中投屑雲門顧鑒遞相脫賺俱抵豎指全無巴鼻遮一隊漢敵國家財盡被烏巨藉沒了也直得上無片瓦下絕卓錫却來眉毛縫罅裏埋冤負屈聲聲叫道無惻隱之心非人也無羞惡之心非人也無是非之心非人也烏巨痒處被他抓着不覺手之舞之足之蹈之驀拈拄杖擲下云遇放咸放

撰述
密教禪師語錄卷上
十一
上堂少室單傳衲僧巴鼻碓背生花驢鳴狗吠厠坑
籌子念摩訶驚起法身無處避無處避若爲論驀拈
拄杖卓一卓云我行荒草裡汝又入深村

衢州大中祥符禪寺語錄

上堂在眼曰見在耳曰聞在手執捉在足運奔豁開
則東西南北把住則毫髮不存且道豁開好把住好
驀拈拄杖卓一卓云一氣不言含有象萬靈何處謝
無私

上堂舉盤山道向上一路千聖不傳慈明和尚道向
上一路千聖不然二尊宿與麼大似靈龜曳尾祥符
道向上一路掘地覓天

上堂靜悄悄處跳得出鬧浩浩處可橫身鬧浩浩處
挨得行靜悄悄處堪駐足所以德山據一條白棒佛
來也打祖來也打且不坐在鬧浩浩靜悄悄處又道
我三十年不曾打着個獨脫底祥符門下若有獨脫
底正好喚來洗脚

上堂月生一無角鐵牛眠少室月生二赤脚波斯入
鬧市月生三水生於水青出於藍驀拈拄杖橫按顧
視云文殊堂裏萬菩薩夜來盡向此中參

謝知事頭首上堂一新一舊跳出窠臼一出入胡

餅裏呷汁一擒一縱開眼作夢一炷一用鱈魚走入
麻油甕所以道若論此事直須揮劍若不揮劍漁父
棲巢古人與麼大似將錢買李子只從赤邊咬且道
結角在什麼處驀拈拄杖卓一卓下座

冬至上堂日南長至慶無不利石笋暗抽條寒巖增
暖氣東村王老半醉半醒林下道人没巴没鼻驀拈
拄杖云若人於此徹根源勝似燃燈親授記擲拄杖
下座

上堂舉鹽官示衆云虛空爲鼓須彌爲槌是什麼人
打得衆無語南泉云我當時若見向他道王老師不
打遮破鼓後來法眼道南泉何須道遮破鼓但道不
打自然是箇破鼓師云鹽官提水放火南泉撥亂灰
飛法眼埋兵掉鬪諸尊宿雖然各出一隻手並無一
人性燥下得一槌只是隨例扛鼓祥符直截與諸人
道卻虛空爲鼓須彌爲槌漆桶叅堂去

歲旦上堂元正一旦萬事成辦大乘小乘并索錢貫
更問佛法如何也是秦時轆轤鑽

寶鑑大師請入金剛五臟師指金剛云賢劫千佛數
末後最慙懃倒握降魔杵高標利物拳心肝無屈曲
腸胃有區分神通願力雖無盡且爲山僧護法門

撰述
上堂譬如擲劍揮空莫論及之不及斯乃空輪絕跡
劔刃無虧正與麼時如何遂顧視左右云填溝塞壑
無人會雨過夜塘秋水深

上堂舉藥山久不上堂寺主白云大眾久思和尚示
誨山云打鐘着寺主打鐘大眾雲集山便歸方丈主
隨後白云和尚許爲衆說話何故一言不措山云經
有經師論有論師又爭怪得老僧後來翠巖芝和尚
云寺主怪藥山不爲衆說話可謂悞他三軍師云翠
巖只具一隻眼殊不知藥山歸方丈便是勞他三軍
掛寺額上堂當頭一着坐斷論訛佛手不能遮古今

爲榜樣人天交慶祖室生輝南來北來盡繇此門而
入真書大篆無非法令鉗鎚拈拄杖卓一卓乃召大
衆云乾坤未立世界未形且道遮一着落在什麼處
遂提起云看看海神知貴不知價留與人間光照夜
擲拄杖下座

上堂不求諸聖不重已靈摺折德山棒啞除臨濟喝
終日泥猪疥狗哆哆和和和和記月之大小歲之餘閏
知他是凡耶是聖耶祥符若放過三十年後遭人簡
點若不放過如何道得轉身句喝一喝云上士繇山
水中人坐竹林

上堂舉文殊問無着南方佛法如何住持無著云未
法比丘少奉戒律又問多少衆無着云或三百或五
百無着問文殊此間佛法如何住持文殊云龍蛇混
雜凡聖同居又問多少衆文殊云前三三後三三乃
召大衆云或三百或五百置之弗論只如文殊道前
三三後三三如何話會良久云竹影掃階塵不動月
穿潭底水無痕

上堂舉圓覺經中道居一切時不起妄念於諸妄心
亦不息滅住妄想境不加了知於無了知不辯真實
雪堂和尚拈云枯樹雲克葉凋梅雪作花擊筒方木
響蘸雪笑冬瓜長天秋水孤鷺落霞師云釋迦老子
擔得一擔瞻矐出來撞着雪堂和尚添得一擔顛預
祥符不是壓良爲賤也要緇素分明生鐵鑄牛頭牽
犁還拽杷智者笑忻愚人驚怪差古往今來幾百
年更向鬼門重貼掛驀拈拄杖云看看釋迦老子來
也向諸人道據虎頭收虎尾第一句下明宗旨卓一
卓下座

建康府蔣山太平興國禪寺語錄

入寺指三門云無礙解脫門重重寶樓閣不勞歛念
八字打開信脚便行自然聲和響順若也躊躇便見

撞牆撞壁

人佛殿燒香云因我得禮你窮源親到底禮拜了燒香自倒還自起

上堂正令全提十方坐斷千差萬別一句該通佛與衆生皆爲剩法恁麼會得全實是主全主是實且超越一句作麼生道良久云蠱毒之家水莫嘗

聖節上堂諸佛不說說祖師不聞聞留下一轉語千古鎮乾坤且道是那轉語驀起恭身叉手云

皇帝萬歲萬萬歲

施主請上堂師據座顧視左右驀拈拄杖云今佛放

光明助發實相義乃卓一下云希有諸比丘是中難比况復提起云還見蔣山拄杖子麼朝到西天暮歸唐土向諸人道有世界以音聲爲佛事有世界以香飯爲佛事有世界以出入息爲佛事復卓一下云且道遮箇世界將什麼爲佛事擲下拄杖云阿喇喇四方八面活鱖鱖

上堂月生一萬像不能逃影質月生二東行不見西行利月生三無言童子口喃喃背手拈起無星秤子秤須彌山重一筋十二兩卽不問諸人且道觀世音菩薩爲什麼頂戴彌陀叅

撰述
上堂一葉落天下秋南來北往竟悠悠一句通萬機
息上下四維無等匹西天人不會唐言獨坐少林癡
面壁帶累兒孫不丈夫被人喚作白拈賊乃召大衆
云雲門念七好叅詳寶公不是閑和尚

上堂高高處無物堪比倫低低處猶難擬議一毫端
上立寶王刹寬廓非外百草頭上突出妙喜世界寂
寥非內權實照用並行敲碎髑髏裏眼睛捏出虛空
裏骨髓且聽諸人東卜西卜忽若把斷要津如何通
信八月秋何處熱

上堂僧問崔趙公問國一祖師云弟子欲出家得否

國一云出家乃大丈夫事非將相所能爲意旨如何
師云來機深辯進云若無舉鼎拔山力千里烏騮不
易騎師云好箇衲僧進云石門聰和尚舉似李都尉
都尉於此悟去時如何師云你且道他悟得箇什麼
進云學道須是鐵漢斫手心頭便判直趣無上菩提
得失是非莫管師云不因上座舉幾乎忘却師乃云
諸佛說不到處祖師提不起時一段光彩盡在蔣山
指甲縫裏放行則三頭六臂把住則水泄不通且道
不放行不把住時如何日月光天德山河壯帝居
上堂月圓月缺循途守轍打破牢關天寬地寬聖人

以百姓心爲心自然海晏河清萬民樂業耕而食鑿而飲終日熙熙然如享太牢不知帝力於我何有哉正與麼時且道還有佛法道理也無喝一喝云三點前三點後

冬至日入新衆寮上堂天不言四時行地不言萬物生聖人不言垂衣拱手萬國來王衲僧不言移凶星爲吉曜捏大地作伽藍裁長補短革故鼎新便見玲瓏八面峭峻一方坐斷溪山包羅風月且入門一句作麼生道一陽來復後瑞氣自騰騰

施主追修請上堂諸佛未出世達磨不西來人人抱

荆山之璞個個懷赤水之珠及乎五葉開敷千燈續焰便見生死交謝寒暑迭遷北里豪家昨日歌今今日哭蔣山與麼告報大似移花兼蝶至買石得雲饒諸人若善叅詳管取終日於聲色頭上坐臥聲色不能染污終日於生死界中出沒生死不能籠罩且據個什麼道理便能如是驀拈拄杖云千聖不知何處去倚天長劍逼人寒

木庵和尚遺書至拈香云大衆還識遮尊慈麼雖與我同條生不與我同條歟稔聞在七閩揚塵兼簸土凌襲宗風不柰何今朝喜見清平路清平路既見畢

竟如何茶傾三奠香爇一爐伏惟尚享

上堂舉洞山與密師伯同到栢巖巖問二上座甚處
來山云湖南來巖云觀察使姓什麼山云不委姓巖
云名什麼山云不委名巖云還理事也無山云自有
廊幕在巖云還出入也無山云不入巖云豈不出
入山拂袖便行巖次日侵早入堂召二上座近前云
昨日問上座不愜老僧意一夜不安今請上座別下
一轉語若愜老僧意便開粥相伴過夏山云却請和
尚問巖云豈不出入山云太尊貴生巖乃開粥同過
夏師云明投暗合八面玲瓏不犯當頭轉身有路曹

洞門下足可觀光若是臨濟兒孫棒折也未放在當
時見他道不委姓劈脊便與一拳這裡挨得身轉非
但開粥相待亦可明牕下安排有麼有麼喝一喝云
漆桶叅堂去

上元上堂今朝上元節是處掛燈毬一燈燃百千燈
燈燈相續重重無盡如寶絲網三世諸佛向光影裏
出現六代祖師向光影裡說法度人四聖六凡向光
影裡頭出頭沒山河大地向光影裡成立諸人若信
得及去覓其光影來處了不可得便乃坐斷報化佛
頭若信不及十二時中被光影使得七顛八倒

上堂舉修山主云是柱不見柱非柱不見柱是非已
去了是非禪薦取師喝云孟春猶寒在日月幾時遷
上堂一切數句非數句與吾靈覺何交涉毒蛇鑽入
你鼻孔蝦蟆咬破你眼睛且喚什麼作靈覺有般漢
東西不辯南北不分便道經行及坐臥你喫粥喫飯
你正是喚奴作郎認賊爲子蔣山直截與諸人道却
毘婆尸佛早留心直至而今不得妙

常州褒忠顯報華藏禪寺語錄

師在和州褒禪受請拈帖云三回兩度推不去今日
依前把不住不是時節因緣亦非人情之故既然如

是因什麼撞頭磕腦不見道順是菩提

上堂方脫鐘山堦級難却來遮裡養殘軀那知蹤跡
難遮掩又見驅馳走使符使符旣至回避無門按下
雲頭和泥合水便見全賓是主全主是賓賓主交參
通同和氣且應時納祐一句作麼生道喝一喝云劍
爲不平離寶匣藥因治病出金瓶

入方丈據座云獅子教兒迷子訣擬前跳擲早翻身
羅文結角交鋒處鶻眼臨時失却蹤古人與麼道也
是徐六擔片板

上堂僧問鐘山頂上雷聲震華藏海中浪拍天洗脚

上船乘快便遮回贏得日高眠如何是到家一句師云坐立儼然進云流水下山非有意白雲歸洞本無心師云你也亂走作麼進云被和尚捉敗師云剗師乃云昔日文殊大士三處度夏一月長者家一月魔宮一月姪妨末後却歸世尊會中解制迦葉欲白槌擯出纔舉念見無量世尊無量迦葉無量文殊世尊云汝欲擯那個文殊迦葉盡其神力槌不能舉後來尊宿拈云好一槌又却放過甘作小乘人師云尊宿與麼也是盲人摸象傑上座今夏蔣山結夏袈裟破夏華藏終夏且道與文殊是同是別若道是同許他

具一隻眼若道是別也許他具一隻眼忽有個不受人瞞底出來道長老也好漏洩只向他道漏洩中有個分曉處急須聽取三處移場定是非頑心全不改毫釐胡言漢語憑誰會鐵額銅頭也皺眉

次日爲太師循忠烈王陞座僧問大賢化德今猶在攀感之心動四維林下道人何以報聊將無孔笛橫吹師云知音知後更誰知進云知音一句則不問無孔笛作麼生吹師豎起拂子云還聞麼進云五天吹不起漢地和難齊師云又被風吹別調中進云只如太師循王今日深領和尚法音未審超何地位師云

泥多佛大進云還許學人借水獻花也無師云又且何妨進云亾過無疑登九品見存此去列三台師云只消遮一句僧禮拜師乃云心生種種法生心滅種種法滅心法兩忘如搗塗毒鼓聞者皆喪又如大火聚近之則燎却面門悟之者立地成佛述之者永劫輪迴所以諸佛所說唯說此心祖師所傳唯傳此法靈山會上五百比丘得之自悟本心如夢如幻於夢幻中不見有我人衆生廣額屠兒得之拌下屠刀叉手云我是千佛一數大集會中大力魔王得之便道我待一切衆生成佛淨盡衆生界空無有衆生名字

我乃發菩提心豈不是大丈夫能爲大丈夫事於過量塵沙劫作過量殊勝佛事山僧今日以如是心說如是法普請大地衆生有情無情同入清淨大解脫門與太師循忠烈王爲不請友同一眼見同一耳聞同一受用作廣大殊勝利益不可思議且憑箇什麼道理便能如是利劍拂開天地靜霜刀纔舉斗牛寒復舉世尊因地布髮掩泥獻花於燃燈如來燃燈見布髮處遂約退衆乃指其地云此一方地宜建梵刹衆中有一賢于長者持標插于指處云建梵刹已竟時諸天散花讚言庶子有大智矣師云太衆燃燈指

撰述
空齋前集詩金卷一
三三
處滴水水生賢于插時天回地轉于斯見得古釋迦
不先今太師不後其或未然更聽重下注脚芟除荆
棘建伽藍七佛常來此處叅地久天長功不墜天花
時復雨毵毵

應庵和尚忌日上堂利劍斬虛空萬象鳴曝曝年年
向斯辰令人倍發惡古者道子不談父德雖然家醜
也要外揚遮老和尚平生事過頭底九百自云著草
鞋住院何苦如舛蛇戀窟美則美矣帶累不肖兒孫
依模脫出贊嘆者從他贊上非非想天毀謗者謗到
空輪水際衆中莫有毀譽不動底麼出來與華藏相

見有麼有麼良久擲下拄柱高聲云侍者收取拄杖
上堂一葉落天下秋風高雲淡水碧空浮達磨不會
接手句少林空坐冷啾啾耐雲門梁根漢復於頭
上更安頭記得僧問雲門達磨九年面壁意旨如何
門云念七師喝云果然只在遮裏良久復云勘破了
也

解夏上堂十五日已前無繩自縛十五日已後脚瘦
草鞋寬正當十五日天無私蓋地無私載風不鳴條
雨不破塊大家撫掌樂昇平一任東倒及西搗喝一
喝下座

上堂舉雲門在嶺中時僧問如何是法身向上事門云向上與你道也不難且道如何是法身僧云請和尚鑒門云鑒卽且置作麼生說法身僧云恁麼恁麼門云此是長連牀上學得底我且問你法身還解喫飯也無僧無語後有僧舉似梁家庵主主云雲門直得入泥入水資福云欠一粒不得剩一粒不得師云雲門渾剛打就生鐵鑄成不動錡鎚火星迸散梁家庵主冷處著把火義出豐年資福開處愛入頭傍觀者晒華藏據款結案也要諸方簡點若也簡點得出生陷無間地獄

上堂舉僧問趙州如何是毘盧頂相州云老僧自小出家不會眼花應庵和尚拈云大小趙州語上偏枯若有問天童如何是毘盧頂相只對他道大底大小底小師云若向趙州語下見得坐殺天下衲僧若向天童語下見得走殺天下衲僧忽有問華藏如何是毘盧頂相只對他道碌磚

上堂秋江清淺時白鷺和煙島良哉觀世音全身入荒草且出草一句作麼生道寰中天子勅草舍家風別

上堂舉僧問巖頭路逢猛虎時如何頭云撥師云巖

頭具殺人不眨眼底手段被者僧一問却向射梁後
鞞避若也簡點得出雖是善因而招惡果

上堂牛頭橫說豎說不知有向上關候子有般漆桶
輦東西不辯南北不分便問如何是向上關候子何
異開眼尿牀華藏有一轉語不在向上向下下手大
悲摸索不着多時雨寒無處晒眼今日普請布施大
衆良久云達磨大師無當門齒

上堂默時說說時默寒山逢拾得拈箇秃掃帚東掃
西掃忽然撞着豐干禪師騎虎出來放下筇掃把手
呵呵大笑恰似販私鹽底草賊有什麼共語處復召

大衆云且道他笑箇什麼良久云東君行正令花發
樹南枝喝一喝下座

上堂撥轉天關掀翻地軸冰凌上走馬劔刃上翻身
未是衲僧行履處萬年一念一念萬年羅籠不肯住
呼喚不回頭亦未是衲僧行履處透脫兩重窠臼別
有生機一路向百草頭上罷却干戈山僧甘心生陷
無間地獄是汝諸人還自簡責麼喝一喝云漆桶叅
堂去

上堂今朝正月半普請大家看過去燈明如來在汝
諸人脚跟下放光動地還見麼若也見得神頭鬼面

裏元來有人在若見不得切忌撞墻撞壁
復舉明招到招慶有度上座問羅山尋常道諸方盡
是麩飯惟有羅山是白飯上座從羅山來却展手云
白飯請麥子招打兩掌度云將謂是白飯元來只是
麩飯招云癡人棒打不忒度至夜間舉似諸禪客次
招近前云不審度云今日便是這箇上座下兩掌有
瑠上座云不用下掌就裏許作麼生道招云就裏許
也道道瑠無對招云是你諸人一時縛作一束倒卓
向屎闌下來日相見珍重師云尋常向諸人道終日
在洪波浩渺中舀水相潑渾身無一點濕是他明招

踏着遮芟子自然用出閑閑地惜乎鋒頭少銳引得
許多葛藤若是華藏見他道將謂是白飯元來只是
麩飯連腮更與兩掌且教遮漢疑三十年

上堂二繇一有一亦莫守一念不生楊生左肘達磨
大師九年面壁覷不破黃面老子三百餘會道不著
德山臨濟咬定牙關一場懺懺華藏到箇裏如何道
得接手句風暖鳥聲碎日高花影重

上堂舉同安察和尚問僧甚麼處來僧云五臺來察
云還見文殊麼僧展兩手掌云展手頗多文殊誰覩
僧云氣急殺人察云不覩雲中鴈焉知沙塞寒僧云

遠趨丈室乞師一言察云孫賓門下徒話鑽龜僧云
名不浪施察云喫茶去僧便珍重察云雖得一場榮
則却一雙足師云拳來拳應踢來踢應拳踢交參孰
負孰勝搖頭擺尾過牢關別足之言誰肯信雖然有
一處論訛在諸人試簡點看

上堂僧問楊岐問慈明幽鳥語喃喃辭雲入亂峯時
如何明云我行荒草裏汝又入深村意旨如何師云
天共白雲曉水和明月流進云應庵道兩箇漆桶失
却鼻孔又作麼生師云要且扶臨濟不起進云適來
和尚恁麼道還扶得也無師云老僧更是不奈何進

云應菴只知他人失却鼻孔不知自家落盡脣毛師
云那裏是他落盡脣毛處進云特地一場愁師便喝
進云若非父子至親爭得赤心片片師云上座又錯
會了進云楊岐道官不容針更借一問慈明便喝又
作麼生師云總是漆桶見解進云楊岐云好喝慈明
又喝楊岐亦喝慈明連喝兩喝楊岐便禮拜又作麼
生師云三生六十劫僧禮拜師乃云一槌便成方木
逗圓孔不假一槌填溝塞壑少人知若也腳踏實地
南洲打到北洲頭愈見金聲玉振若也半前半後東
土移來西土看對面隔千山華藏口似乞兒破席袋

撰述
和底一時翻了也若也會得乾三連坤六段若也不
會切忌地盈虛

靈隱佛海禪師遺書至上堂僧問昨夜春風十分惡
掀倒飛來峯倒卓嘉州大象喫一拳陝府鐵牛擲折
角正與麼時佛海禪師遷化向甚麼處去師云大衆
證明進云恁麼則煩惱海中爲雨露無明山下起雲
雷師云川僧得與麼蓋直師乃云呼猿洞口虛空迸
裂鴉飛不度如行如說二十三天撲帝鐘打刀須是
賓州鐵喝一喝下座

上堂驀拈拄杖卓一下云上來講讚無限勝因拄杖
子平地踣跳撞倒燈籠露柱驚起太湖龍王惡發把
須彌山一擱直得海晏河清風恬浪靜狸奴白牯遞
相贊言善哉善哉風以時雨以時今年蠶麥熟五穀
登東村王大嫂家夜來失卻一頭水牯牛渾家大小
尋討不見肚裏熟悶小女阿八從後門出長聲歌曰
尋牛須訪迹學道訪無心跡在牛還在無心道易尋
山僧聞得呵呵大笑且道笑箇什麼喝一喝云三十
年後

聖節上堂靈機廓徹妙叶無私智鑑洞明通途絕迹
一切處現吉祥事不昧見聞覺知亘塵沙劫堅密身

突出行住坐臥天上天下歌有道五湖四海樂無爲
林下道人將何報德多子塔前消息在一回拈出一
回新

上堂釋迦不說說拗曲作直迦葉不聞聞望空啟告
馬祖卽心卽佛掛羊頭賣狗肉趙州勘庵主貴買賤
賣分文不值且如文殊是七佛之師因什麼出女子
定不得河天月暈魚分子榭葉風微鹿養茸

上堂經行及坐臥常在於其中做牛便要拖犁拽杷
做馬便乃銜鐵負鞍爲人原始要終不求諸聖不重
已靈或則三條椽下或則鬧市門頭成佛作祖披毛

戴角上天堂入地獄擔鐵枷喫鐵棒總不爲分外百
千年後築著聲頭拳踢相應鼻孔遠天也怪山僧不
得何故賊無種相鼓籠

上堂舉僧問雲門歿向什麼處去雲門對他道在什
麼處師云雲門秉殺人刀活人劍點簡將來要且不
知去處忽有問華藏歿向什麼處去只向他道薰風
自南來殿閣生微涼

請典座上堂舉夾山在潞山克典座潞山一日問今
日堂中喫甚菜座云兩年同一春山云如法修事著
座云龍宿鳳巢師云柄霸在手縱奪臨時敲磕將來

撰述
百味具足其中只欠一味且道是油是醬若箇點得出華藏功不浪施其或未然更聽重下注脚輔弼宗門有老成一番提掇一番新咬薑呷醋知鹹淡便是叢林過量人

上堂拈拄杖卓一下云迷時只迷遮箇復卓一下云悟時只悟遮箇迷悟兩忘糞掃堆頭重添搗搗莫有向東湧西没全機獨脫處道得一句麼若道不得華藏自道去也擲拄杖下座

上堂舉同安察和尚云喜鵲鳴寒檜心印是伊傳僧云何必察云衆中有人在僧云同安門下道絕人荒察云胡人飲乳返怪良醫僧云休休空云老鶴入枯池不見魚蹤跡師云動絃別曲有唱有酬其唱愈高其和愈峻其間鄭衛之聲雖則雜然五音六律拍拍是令

臨安府徑山興聖萬壽禪寺語錄

淳熙四年正月初七日師在常州華藏受請望 闕

謝 恩畢捧 勅黃示衆云 鳳闕頒宣羣生聳耳

當陽拈出匝地普天喚回枯木龍吟別是一壺春色若也見得 皇恩佛恩一時報畢其或未然卻請維那分明宣過拈疏云諸佛說不到處祖師提不起時

結角羅紋語言三昧盡從箇裏流出輝騰今古不墮
斷常欲令四衆共知何妨重爲說破

陞座拈香祝 聖罷歛衣就座僧問九重丹詔下雲
端瑞氣融融宇宙寬拈出少林無孔笛憑師吹起萬
年歡師云爐燼裊裊瑞氣盤空進云撥出虛空爲福
海撥轉須彌作壽山師云不爲分外進云三聖道我
逢人卽出出則不爲人時如何師云點進云撥師云
莫杜撰進云八字打開師云你從那門而入僧喝一
喝師云幾不問過進云興化道我逢人卽不出出則
便爲人時如何師云重言不當吃進云瞞和尚一點

不得師云一任踣跳僧禮拜師乃云至化無私大千
普應皇恩廣被巖谷生春雷動風行龍驤虎驟無量
殊勝併集恒沙妙義全彰不歷化城直登寶所寶所
旣至遇緣卽宗法隨法行法幢隨處建立移身換步
物我一如各各不相知法法不相到且全身奉重一
句作麼生道良久云天上有星皆拱北人間無水不

朝東

入寺上堂僧問華藏海中張巨網慣打鯤鯨凌霄峯
頂握鉗鎚陶鑄佛祖而今爐鞴旣開一鎚便就時如
何師云漆桶生光進云恁麼則和尚不妨好手師云

莫相鈍置進云僧問應庵和尚遠離光孝來赴妙巖如何是不動尊庵云一別蓮城五日程意旨如何師云步步踏實進云既是不動尊因甚却有五日程師云穿天下人鼻孔進云和尚遠離華藏來赴徑山如何是不動尊師云步行進云昔日應庵今朝和尚師云老僧不識應庵進云今日又爭諱得師云遭上座簡點僧禮拜師乃云未到此間不妨令人疑著及乎到來依前門開八字樓閣叅空走使文殊普賢驅馳釋迦彌勒拈一放一草偃風行舉一明三目機銖兩如鏡炤鏡似空藏空有佛處敲枷打鎖無佛處見兔

放鷹忽若總不與麼如何通信良久云雲靜日月正雪晴天地春

淳熙四年五月初十日恭奉 聖旨就景德靈隱禪寺開堂 皇帝遣中使降賜 御香師謝 恩捧香示衆云 御寶親封 君王頒賜不是人間薰陸亦非海外旃檀持來價重娑婆熱處爲祥爲瑞光揚佛日仰贊 皇圖山河大地發歡喜心蠢動含靈普薰正見

判府安撫徽猷度疏師接乃云窮諸玄辯若一毫置於太虛竭世樞機到底不離於正念復呈起疏召大

撰述
卷一
三
衆云正念生也且道其中事作麼生却煩表白宣讀
陞座拈香云此一瓣香恭爲祝延 今上皇帝聖躬
萬歲萬歲萬萬歲 皇帝陛下恭願 聖明御極膺
萬國之不圖賢哲佐時協千齡之慶會此一瓣香恭
爲祝延 光堯壽聖憲天體道性仁誠德經武緯文
太上皇帝聖躬萬歲萬歲萬萬歲恭願 堯仁廣被
舜德彌新億萬斯年永隆 睿算此一瓣香恭爲
壽聖齊明廣慈太上皇后 中宮皇后 皇太子
皇孫兩宮天眷莊嚴福算恭願 壽山增峻福海彌
深同明般若正因共植金剛種智此一瓣香奉爲

叅政相公

叅政相公

樞密相公

樞密相公

判部尚書

判部侍郎

侍郎

中書舍人

舍人

捧香天使

都知太尉

御帶太尉

諸位勳貴

判府安撫徽猷

都運敷文

文武百僚同資祿算

此一瓣香燕向爐中奉爲前住明州天童山景德禪
寺第十八代應庵大和尚用酬法乳之恩乃就座靈
隱佛照禪師白槌云法筵龍象衆當觀第一義師云
正令已行千差削迹佛佛從茲授手祖祖於是相傳
怎麼會得便乃高揖釋迦不拜彌勒其或尚畱觀聽
何妨致問僧問正法眼藏破顏微笑密付飲光涅槃

妙心三拜歸位獨傳二祖一花五葉徧界芬芳當恁
麼時的的相承一句作麼生道師云須彌頂上浪滔
天進云大千俱捏聚祖令正當行師云雲從龍風從
虎進云中興此道正在今時未審和尚將何祝 聖
師云當將日月爲天眼指出須彌作壽山進云恁麼
則舜日堯風無盡時師云滿口道著進云世尊拈花
迦葉微笑意旨如何師云車不橫推理無曲斷進云
世尊道吾有正法眼藏分付摩訶大迦葉又作麼生
師云蠱毒之家水莫嘗進云只如和尚見應庵分付
箇什麼師云一物也無進云爭奈破砂盆何師云一

人傳虛百人傳實僧禮拜師云切忌妄通消息僧問
演第一義提最上乘會凡聖於飛來峯前集人天於
冷泉亭畔把住剎天回地轉放行則海晏河清當恁
麼時且道是誰家風月師云人人有分進云一片月
生海幾家人上樓師云一句合頭語萬劫繫驢概進
云肅宗帝問忠國師如何是十身調御國師云檀越
踏毘盧頂上行李如何師云今古歷然進云普光
明殿上撥轉鐵牛機師云此心能有幾人知進云只
如國師道檀越踏毘盧頂上行還明得十身調御也
無師云料掉沒交涉進云今日忽有問徑山如何是

十身調御作麼生祇對師云垂手過膝進云大唐扶
得真天子曾踏毘盧頂上行師云別是一壺春僧禮
拜師云只道得一半師乃云祖師心印狀似鐵牛之
機去則印住住則印破不去不住當頭坐斷千眼頭
開明如杲日寬若太虛不可以智知不可以識識人
人具足物物圓成拈一機則千機萬機頭赴說一句
則千句萬句流通譬如善舞太阿一不觸手二不墮
地三不住空又如獅子筋琴撫之則羣音頓絕所以
道大人具大見大智得大用攬長河爲酥酪變大地
作黃金普令一切有情無情不墮有爲不住無爲富

貴不能驕貧賤不能困各各安其分守其當直得堯
風蕩蕩帝道平平野老謳歌漁樵鼓舞且憑箇什麼
道理便乃如是天高羣象正海濶百川朝

謝詞不錄

復舉波斯匿王問佛勝義諦中還有世俗諦否若言
其有智不應一若言其無智不應二一二之義其義
云何佛言大王於過去龍光佛所曾問此義我今無
說王亦無聞無說無聞是名一義二義師云拓開天
關踏翻地軸言言見諦句句朝宗還他過量人能提
過量事於過量境界中作過量殊勝佛事雖然未免
一處論訛在今日忽有問徑山勝義諦中還有世俗

禪否若言其有智不應一若言其無智不應二二二
之義其義云何只對道日月光天德山河壯帝居太
平何以報萬國盡懽呼久立衆慈伏惟珍重靈隱佛
照禪師白椎云諦觀法王法法王法如是

府中歸上堂一出入一動一靜酒肆茶坊紅塵鬧
市猪肉案頭慕然築著磕著如虎戴角凜凜風生及
乎歸來相見依舊眉毛烏翠律地且道是佛法耶世
法耶記得修山主云具足凡夫法凡夫不知具足聖
人法聖人不會卓拄杖云一不知二不會東西南北
轉露霈

建會上堂千巖釀秀萬木回春羅漢會興貫通今古
一願龍王福護瑞雪快晴二願施主歸崇駢臻輻輳
三願大衆同心同德扶掖叢林滴水冰生始終一致
山僧曾有語云一手不獨拍衆手鳴擗擗豁開三要
三玄門堪與人天爲軌則昔日與麼道今日與麼舉
也是熟處難忘

復舉灰心和尚示衆云一人所在也須到半人所在
也須到無人所在也須親到師云灰心和尚有年有
德語不安發如大冶精金千煅萬煉成繞拈之金然
後裁截並無虛弃雖然畢竟意歸何處三邊一箭收

撰述
功後四海何愁不太平

結制上堂今朝十五日叢林皆結制徑山有條攀條
無條攀例逼拶露柱燈籠盡要心空及第現前普請
證明不妨神通遊戲下座各叙時暄便是靈山受記
遂拈拄杖云唯有拄杖子列列挈挈磽磽論諸搖頭
擺尾道不是不是復召大眾云且道拄杖子有什麼
長處遂擲下云不是不是下座

請前堂首座鶴林印和尚立僧上堂佛法無人說雖
慧不能了去却上頭關面南看北斗虛空掛劒殺活
臨時鞭起臨濟暗驢放出五祖鐵酸賺盡大地人亾
鋒結舌扶墜佛祖正宗還他過量人能持過量事過
量人已見過量事已聞且不涉言詮一句如何通信
下座煩知事頭首大眾詣首座寮扣問

降 御香到上堂天地合其德日月合其明四時合
其序風以時雨以時國泰時平民康物阜萬姓四民
合其一心熙熙焉陶陶焉一人有慶兆民賴之是故
林下禪人居於四民之外二六時中據德山棒擔睦
州板驅耕夫牛奪饑人食拈一莖草作丈六金身將
丈六金身作一莖草卷舒自在縱奪臨時堪報不報
之恩共助無爲之化

復舉肅宗帝問忠國師如何是十身調御國師道檀
越踏毘盧頂上行前日開堂次僧問如何是十身調
御山僧對他道垂手過膝諸人且道山僧與麼答他
與國師是一是二若道是一語言參差若道是二佛
法豈有兩般畢竟如何大海若知足百川應倒流
舉後堂演首座立僧上堂舉一不得舉二放過一著
落在第二徑山卽不然舉一了舉二截斷露布葛藤
突出衲僧巴鼻如獅子王哮吼一聲壁立萬仞誰敢
正眼覷著一向恁麼去三十年後何止法堂前草深
一丈所以釋迦老子道譬如琴瑟箏篴雖有妙音若

無妙指終不能發諸人要知妙音妙指齊發麼下座
詣首座寮告香

天申聖節上堂心同虛空界示等虛空法證得虛空
時無是非法旣無是又無非便乃以虛空爲正體
以恒沙國土爲妙用以須彌不動之山爲壽山以功
德甚深之海爲福海包羅萬有津濟四生實天中之
天聖中之聖適當誕彌之月仰傾葵藿之誠一句全
提千祥併集祝 聖君壽地久天長

上堂平白地上拈起一絛毫頭盡大地人只鋒結舌
遠過恒沙國近在口皮邊會則確菴生花不會則鐵

牛斲草去却兩頭機如何通信良久云久雨不晴脚
下泥深三尺

謝知事上堂拈拄杖橫按云你有拄杖子我與你拄
杖子你無拄杖子我奪你拄杖子芭蕉老漢只能瞻
前不能顧後將常住物私置草簿花破過頭致令後
代兒孫向拄杖子節日上更生節目凌辱宗風徑山
乾索索地有也不與無也不奪爲甚如此卓拄杖云
一朝權在手看取令行時

出鄉上堂六月炎炎如火熱誰知冷處勝冰雪紅塵
鬧市等個人七佛軌儀都漏泄報龍王須福護大千

捏聚爲檀度一言劄住萬機通自然光壯少林風
復舉世尊一日食時將至勅阿難持鉢云當依七佛
儀式阿難遂問如何是七佛儀式世尊召阿難阿難
應諾世尊云持鉢去師云大小世尊被阿難輕輕靠
著未免喚鐘作甕

上堂舉僧問投子月未圓時如何子云吞却三箇四
箇僧云圓後如何子云吐却七箇八箇師云吞却與
吐却算來無處著要見滑稽人便是王番綽

上堂無門無傍四達皇皇吾不知其名字故強名之
曰道厠坑箒子踣跳入諸人八萬四千毛竅裡觸著

五臟神惡發連兜兩掌直得血濺梵天山僧聞得袖
手熙熙如登春臺如享太牢是汝諸人還覺腦門重
麼喝一喝下座

施司諫訃音至上堂風行草偃水到渠成信脚與麼
來雲收霧捲是處皆春信脚與麼去空澄海湛物我
一如所以道去來不以象動靜不以心如是則塵塵
刹刹普現威權蓋色騎聲纖塵不立羅籠不肯住呼
喚不回頭古聖不安排至今無轍跡且道司諫施公
卽今在什麼處良久云黃梁纔夢斷竺國一花敷復
說偈云昔年相見談真諦今日陞堂話去來一念廓

然無向背春光鐵樹自花開

上堂僧問世尊道見見之時見非是見見猶離見見
不能及時如何師云一槌擊碎進云只如山河大地
日月星辰縱然前陳離見見底是箇什麼師云分身
兩處看進云直得描不成畫不就師云也是齋後鐘
師乃舉鏡清問玄沙學人乍入叢林乞師指箇入路
沙云還聞偃溪水聲麼清云聞沙云從遮裏入鏡清
於此得箇入處五祖和尚云果是得入一任四方八
面若也未然輒不得離却遮裏大慧叔祖云若要真
箇得入直須離卻遮裏師云三大老總是歧路相漆

桶相指有甚快活處徑山則不然入之一字亦不喜聞

謝知事頭至上堂云叙謝之餘復有何事其進也風行草偃水到渠成其退也王蘊荆山其價愈重且道不落進退一句作麼生道油煎石磔盤風吹毛毬走虛空背上白毛生拈得鼻孔失却口喝一喝下座上堂諸佛說不到處人人開口道著諸佛行不到處人人舉足踏著既道著又踏著因什麼從朝至暮不自覺知良久云只爲分明極翻令所得遲

上元上堂十五日已前明頭來明頭打十五日已後

暗頭來暗頭打正當十五日一燈然百千燈燈燈相續廓徹聖凡觀世音菩薩將錢買胡餅放下因什麼卻是箇鐵酸賺若作佛法商量故是匙挑不上不作佛法商量平地陷人無數總不與麼也是食飽傷心下座

街坊納疏上堂僧問寶山旣到莫空歸如何是徑山寶師云有眼者見進云圓陀陀光鏘鏘遮那邊無不著師云海神知貴不知價畱與人間光炤夜進云和尚還知麼師云老僧若知卽說似上座師乃云去年第一會水陸街坊今年羅漢第一會禮納疏識得

去年人便是今年事今年與去年非新亦非故搨鼓
共證明眉毛俱卓豎北斝打三更西瞿日未暮其施
汝者不名福田供養汝者墮三惡道還會麼行到水
窮處坐看雲起時

復舉僧問趙州如何是不錯底路州云明心見性是
不錯底路師云趙州眼觀東南意在西北大似狐狸
戀窟有甚快活處忽有問徑山如何是不錯底路只
向他道家家門裏透長安

上堂舉僧問風穴語默涉離微如何通不犯穴云長
憶江南三月裏鷓鴣啼處百花香風穴老和尚將白
麩和麩殼舉了引得後來人徒向百花香處作道理
成羣作隊外邊打之遶徑山則不然忽有問語默涉
離微如何通不犯卽對他道置將一問來

上堂修造未逾兩箇月叢林便覺日荒涼今朝重整
舊洪範鐵佛須教盡放光記得古人有一日不作一
日不食之語時時提起咬嚼過如醍醐灌頂諸人若
信得及驀地咬透便見禪道佛法當甚破甌單下座
四月八上堂今朝乃是黃面老子脇誕令辰諸方濃
煎香湯謂之浴佛徑山有條攀條大家溷滑佛佛或
時出或時沒從來不守舊窠窟既不守舊窠窟且作

麼生浴下座佛殿裏燒香

端午上堂五月五日端午節陰雲靄隼甘雨未決

君王降賜寶香林下祈求懇切孚祐龍善時節好將

一雨潤焦枯匝地清涼消惱熱記得僧問乾峯十方

薄伽梵一路涅槃門未審路頭在什麼處峯以拄杖

子畫一畫云在遮裏僧後請益雲門門拈手中扇云

扇子踔跳上三十三天築著帝釋鼻孔東海鯉魚打

一棒雨似盆傾大衆乾峯搖頭雲門擺尾亘古亘今

挂人唇齒徑山有條攀條拈拄杖擲下云會看雲雷

殷地起

上堂僧問放行持地隔千山把住無端亦自瞞千手

大悲難摸捺鐵牛撞破趙州關如何是趙州關師云

天上天下人透不過進云有佛處不得住時如何師

云頭上漫漫進云無佛處急走過又作麼生師云三

千里外逢人不得錯舉進云恁麼則不去也師云割

進云摘楊花摘楊花又作麼生師云丁一卓二進云

金毛獅子尾吒沙師乃笑僧禮拜師乃云有佛處不

得住陝府鐵牛雙角露無佛處急走過南海波斯鼻

孔大三千里外摘楊花種荳豨來生稻麻拈拄杖云

趙州來也遂卓一卓下座

撰述
卷之四
四三
上堂舉僧問投子依稀似半月彷彿若三星乾坤收
不得師於何處明投子云道什麼僧云想師只有湛
水之波且無滔天之浪投子云閑言語雪竇拈云投
子古佛不道不知箇點將來直是天地懸隔纔問和
聲便打師云田地穩密佛眼不能窺坐籌帷幄決勝
千里還他投子老人遮僧也解扣關擊節上門上戶
只是插手脚不得雪竇道和聲便打也是賊過後張
弓

臨安府景德靈隱禪寺語錄

淳熙七年六月二十四日師在徑山受請望 闕謝

恩畢捧 勅黃示衆云 九重天上降來善法堂前
拈出明如杲日寬若太虛光揚佛祖家風流通正法
眼藏恁麼見得堪報不報之恩其或未然維那分明
道破

拈疏云黃面老子二千年前靈山會上付囑 國王
大臣一則語流布天上人間綿綿不墜有眼者見有
耳者聞聞見既通塞却耳根更須諦聽陞座拈香祝
聖罷歛衣就座僧問 丹書來鳳闕瑞氣藹禪坊少
室無私句當機願發揚師云杲日當空進云萬邦歌
舜化千載祝堯年師云傾盡此時心進云安撫疏中

撰述
道徑山天目之奇峰久尸法席靈隱錢塘之勝槩願
得主盟且道住靈隱好住徑山好師云一點水墨兩
處成龍進云兵隨印轉將逐符行師云直須截斷脚
跟始得進云恁麼則草鞋高挂龍牀角坐振飛來第
一峯師云聲前句後一時收師乃云一處通十處百
處一時通一處透千處百處一時透如開武庫錯落
交輝又如大火聚覩著燎却面門如是則居方則方
過圓則圓拈一莖草作丈六金身拈丈六金身作一
莖草坐斷情塵意想不落見聞覺知敲唱俱行十虛
通暢且移身換步一句作麼生道薰風生闌外白日

透須彌

入寺上堂僧問喝石巖畔中興後五百歲叢林靈鷲
峯前重新二千年前公案拈花微笑卽不問正令全
提事若何師云普天匝地進云斬新日月特地乾坤
師云又得上座重證明進云憑師一滴曹溪水散作
皇都內苑春師云你脚跟下事作麼生進云適來親
從僧堂裏來師云畢竟是箇什麼進云劄師云杜撰
禪和師乃云孤峯頂上目視雲霄未爲究竟十字街
頭和泥合水轉見周遮二途不涉別有生機一路如
龍得水似虎靠山把斷要津不通凡聖猶落時人升

降處而今坐立儼然見聞不昧箇箇負冲天氣槩人
人懷赤水之珠到箇裏如何通信如何受用所以道
是法住法位世間相常住如是則山河大地不礙眼
光四聖六凡互爲主伴坐見聲和響順萬法無差舉
一明三日機銖兩橫該豎括縱奪臨時且到家一句
作麼生道蒲團時倚無餘事永日寥寥賀太平
淳熙七年八月二十九日恭奉

聖旨就本寺開堂 皇帝遣中使降賜 御香師領
衆謝 恩畢捧香示衆云 中天頒降大地蒙薰聚
爲光明幢散作香水海輝騰佛日丕贊 皇圖天上

人間開佛知見

判府安撫尚書度疏師接呈起云釋迦老子四十九
年橫說正說說不到處總在箇裏流出包羅萬有囊
括十虛如是信得 皇恩佛恩一時報畢設或未然
何妨道破

指法座云此坐高廣從古若佛若祖盡向頂額上揚
塵簸土埋沒已靈今日當頭坐斷直教八面風清拈
香云此一瓣香恭爲 今上皇帝祝延 聖壽萬歲
萬萬歲此一瓣香恭爲 光堯壽聖憲天體道性仁
誠德經武緯文太上皇帝祝延 聖壽萬歲萬萬歲

此一瓣香恭爲 壽聖齊明廣慈太上皇后 中宮
皇后 皇妃 皇太子 皇孫 兩宮天眷莊嚴福
壽此一瓣香奉爲 大丞相暨 合朝文武百官同
增祿算此一瓣香四年於茲兩回拈出奉爲前任天
童山第十八代先應庵大和尚用酬法乳之恩欽衣
就座徑山印和尚白槌云法筵龍象衆當觀第一義
師云第一義諦空洞無象表裏一如佛及衆生盡爲
增語且作麼生觀若有心觀屬妄想無心觀屬斷見
不有不無心觀顛預佛性莫有具透關眼衲僧出來
大家擎展僧問 九重天上降香來遍界祥光撥不

開佛祖機先提正令蟪蛄眼裏舞三臺正與麼時知
恩報恩一句作麼生道師云天高羣象正海濶百川
朝進云直得龍陰霧起虎嘯風生師云錦上鋪花又
一重僧問釋迦掩室淨名杜詞以至諸方橫拈倒用
總是撩鈎搭索畢竟直截一句作麼生道師云迅雷
不及掩耳進云德山見人入門便棒臨濟見人入門
便喝如何師云鈎頭有餌秤尾無星進云德山道我
宗無語句一無一法與人如何師云殺人刀活人劍
進云臨濟道赤肉團上壁立千仞又作麼生師云富
嫌千口少貧恨一身多進云長袖善舞多財善買師

云且喜沒交涉進云二大老恁麼告報輝映古今未
審靈隱作麼生師云別是一壺春色進云金鍬慣調
曾百戰鐵鞭多力恨無讐師云只得瞻之仰之僧問
法幢高建御樓前正令全提法鼓纔擲金殿上歡聲
鼎沸直得天垂雨花帳香散玉樓風爲國開堂願
聞法要師云祥雲捧日進云恁麼則天人羣生類皆
承此恩力師云粉骨碎身未足酬進云只如衲僧分
上事又作麼生師云鐵額銅頭不奈何進云祖師道
心隨萬境轉轉處實能幽如何是轉處實能幽師云
十字縱橫活鱗鱗進云隨流認得性無喜亦無憂又

作麼生師云八臂那吒輓繡毬進云雲門云咭啞舌
頭老僧倒退三千里意旨如何師云蠱毒之家水莫
嘗進云便與麼坐樂昇平去也師云一人有慶兆民
賴之師乃云靈源不昧萬古徽猷入此門來莫存知
解知解既不生如王寶劔殺活臨時舉一明三日機
鉢兩塵塵刹刹普現威權物物頭頭全彰正眼便見
一塵合法界一句截千差於一毫端現寶王刹坐微
塵裏轉大法輪高而無上仰不可及淵而無下深不
可測自然風行草偃水到渠成不是神通妙用亦非
法爾如然何故乃是當人從無量劫來現成受用境

界契券分明直饒千佛出現各各放大寶光也侵占一星兒不得所以道一切法不生一切法不滅若能如是解佛法常現前以此壽 聖人則天長地久以此祝賢佐則伊尹周公以此保國安民以此康福天下殊勝中殊勝奇特中奇特畢竟結角羅紋在什麼處天上有星皆拱北人間無水不朝東

謝詞不錄

復舉僧問百丈大智禪師如何是奇特事百丈云獨坐大雄峯僧禮拜百丈便打師云百丈善能據虎頭亦解收虎尾雖然頭尾兩全至竟未徹源底今日忽有問靈隱如何是奇特事只對他道爲 國開堂僧

若禮拜但云知恩方解報恩且道與百丈是同是別若揀得出平步青霄其或未然更聽一頌虎驟龍驤與麼來驀然平地起風雷棒頭正眼明如日凜凜清風廓九垓久立衆慈伏惟珍重徑山印和尚白槌云諦觀法王法法王法如是

解夏上堂四月十五日結七月十五日解六隻毘子滿盆紅大都只是看頭采喝一喝

徑山別峯和尚至上堂舉仰山道東寺師叔若在慧寂不致寂寥師云仰山和尚好語只是語上偏枯靈隱卽不然徑山師叔若在靈隱不致寂寥何故闍蜀

同風

上堂舉老宿云祖師九年面壁爲訪知音若與麼會將來喫鐵棒有日在又有一老宿云祖師九年面壁何不慚惶若與麼會更買草鞋行脚三十年瑯琊和尚云旣不然且道祖師面壁意作麼生欲得不招無間業莫謗如來正法輪師云二老宿敲磚打瓦瑯琊和尚盡虎成狸諸人要見祖師面壁底意旨麼窮坑難滿

上堂五日一叅諸方常例不說少室單傳不說靈山受記會則目前包裹不會則三頭六臂忽有箇不受人瞞底出來道遮裏是什麼所在說會與不會只對他道作賊人心虛

會慶聖節上堂虛空可量風可繫無能盡說佛功德佛功德海旣難量吾君聖壽亦如是

出鄉歸上堂持鉢去持鉢歸草鞋根斷通消息玲瓏八面盡光輝遊魔宮入虎穴當機撞著惡聲頭直教心地頭休歇且據個什麼道理便乃如是老不以筋力爲能

復舉黃龍南禪師示衆云有五種不易一化者不易二施者不易三變生爲熟者不易四端坐喫者不易

更有一種不易是什麼人良久云譬便下座時真點胸作首座藏主問云適來和尚道五種不易是什麼人首座云腦後見腮莫與往來師云一手不獨拍兩手鳴擗擗豁開三要三玄捏碎佛祖標格村歌社舞得人憎勝似當年白拈賊

上堂今朝三月十五天色半晴半雨十分春色在枝頭滿眼覷見沒可觀報諸人莫莽鹵甜瓜徹蒂甜苦瓠連根苦

上堂僧問南泉和尚云自小牧一頭水牯牛擬向溪東放不免食國王水草擬向溪西放不免食國王水草意旨如何師云四稜蹋地進云南泉又道不如隨分納些些總不見得如何是納些些師云橫該豎抹師乃舉南泉示衆云王老師自小牧一頭水牯牛擬向溪東放不免食他國王水草擬向溪西放不免食他國王水草不如隨分納些些總不見得長慶云南泉是前頭爲人後頭爲人雲門云且道是牛外納牛內納直饒說得納處分明我更問你覓牛在雪竇云一時穿却師云南泉起模畫樣長慶披砂揀金雲門鼻孔先穿雪竇據欵結案幕拈拄杖云更有一箇在什麼處擲拄杖下座

撰述
上堂有一句子到汝諸人截却舌頭無一句子到汝
諸人一任橫三豎四二途不涉佛眼難窺狹路相逢
握鞭回首卽不問諸人只如趙州到茶菓輕輕靠卻
拄杖便出去意作麼生喝一喝云禹力不到處河聲
流向西

結夏上堂云十四十五立規立矩六十七無固無
必以大圓覺爲我伽藍身心安居平等性智黃面老
子二千年前留一則公案直至於今毫髮不差靈隱
移向十四日施展諸人還見麼還聞麼驀拈拄杖卓
一卓云只此見聞非見聞無餘聲色可呈君箇中若
了元無事體用何妨分不分喝一喝下座

上堂舉僧問巖頭浩浩塵中如何辨主頭云銅砂羅
裏滿盛油師云巖頭拔貧做富未是作家今日忽有
問靈隱浩浩塵中如何辨主只對他道日輪正當午
喝一喝

上堂平白地拈起一絲毫頭盡大地人凸鋒結舌百
尺竿頭進得一步妙喜世界百雜碎達磨大師九年
面壁知他是真耶是僞耶靈隱咬定牙關力盡神疲
也簡點他不出何故彼彼丈夫三十年前五十年後
拳踢相應忽然悟去未免撞入漆桶隊裏到箇裏如

何鐵卵生兒

復舉僧問法眼如何是曹源一滴水法眼對道是曹源一滴水師云法眼和尚向百戰場中舞纛旗未免傍觀者哂忽有問靈隱如何是曹源一滴水只對他道和屎合尿

葛中書請上堂獅子教兒迷子訣擬前跳擲早翻

羅紋結角交鋒處鶻眼臨時失卻縱恁麼觀來是什麼宗旨是什麼標格是什麼去處還有開口分也無所以靈山會上百萬衆前黃面老子拈起一枝花獨迦葉尊者破顏微笑世尊便云吾有正法眼藏涅槃

妙心分付摩訶大迦葉落第二頭臨濟問黃檗佛法的的大意三遭六十痛棒落第三首總不與麼牙如劒樹口似血盆大棒打不回頭千人萬人羅籠不住正是十字街頭癡漢見解大丈夫漢眼裏有筋皮下有血二六時中只守閑閑地饑則喫飯困則打眠寒則向火熱則乘涼上無諸佛可仰下無衆生可度人與非人性相平等撞著明眼道流輕輕拶著便見水裏火發正與麼時憑箇什麼道理故能如是良久云自從踏斷曹溪路直向毘盧頂上行

復舉錢塘昔有官人因僧相見次便問甚處來僧云

馬大師處來官云近日說何法僧云卽心卽佛被官人揖出次日復有一僧相見官問甚處來僧云馬大師處來官云近日說何法僧云非心非佛又被官人揖出師云手擎仲尼日月腰佩佛祖靈符須還避官人靈隱今日不免更爲重說傷言卽心卽佛也揖出非心非佛也揖出地轉天回豈等閑卽知此物非他物以此顯追崇決定當超越次回陰騰保家堂自然福壽永無雙

薦信齋居士

上堂窮諸玄辯竭世樞機糞掃堆頭重添搥搥明投暗合水到渠成作賊人心虛抱賊叫屈德山棒如雨

點臨濟喝似雷奔正是平地上干戈太平時細作衲僧家有一條活路千聖不曾踏著土曠人稀驀拈拄杖云拄杖子列列孛孛善別端倪遂擲下云好日多同

上堂達磨不來東土二祖不往西天石室行者踏碓忘却移步玄沙討魚賣峭踏翻釣船且道遮一隊漢還有衲僧巴鼻也無良久云當門不用栽荆棘後代兒孫惹著衣

解夏上堂一箇葫蘆纔倒地滿地葫蘆盡傾倒欲識單傳直指禪今日鬪湊得恰好

上堂舉僧問巖頭路逢猛虎時如何頭云撥師云巖頭眼觀東南意在西北好一撥性命落在別人手裏淳熙十年八月初三日乞退靈隱得 旨上堂四年居此日波波累及禪和奈何今感 聖恩林下去一輪秋月照天河

明州太白名山天童景德禪寺語錄

淳熙十一年正月在平江元知府庵受請上堂舉先應庵受天童請日偈畢乃云山僧亦有一偈舉似大眾去年八月間得 旨與安閑擺 水雲性縱步到陽山元宅諸子弟忻然力追攀菴居二箇月開懷宇

宙寬忽接四明信來書意盤桓天童虛法席使君語猶端迢迢遣專使不問路行難山僧臨晚景不敢自相瞞撻鼓樂與行四衆亦忻歡先師未了底應是起波瀾敢問大眾如何是先師未了底一回飲水一回噎臨濟德山俱汗顏

上堂祖師心印不涉言詮問訊燒香早成多事行棒行喝開眼尿床舉古舉今泥中洗土別有向上一路千聖不傳總是熟睡饒噤語衲僧家心憤憤口悱悱到者裏如何卽是以拂子擊禪床云衲帔蒙頭萬事休此時山僧都不會

上堂舉玄沙問鏡清不見一法是大過患汝道不見
是什麼法清指露柱云莫是不見遮箇法麼沙云湖
中清水白米從汝喫佛法未夢見在師云二尊宿驀
劄相逢大似小兒則劇相似佛法身心何在先應庵
拈云鏡清放頑佛也不奈伊何若不是玄沙識破幾
被露柱吞却師喝云若教頻下淚東海也須乾
結夏上堂 年前舊公案今日拈來重剖判任是
鐵眼與銅睛也須更入紅爐煨衆中忽有箇不受人
瞞底出來道盡大地是箇紅爐也煨某甲不破只向
他道也知你向鬼窟裏作活計

約齋張直閣書至上堂佛佛授手祖祖相傳不昧見
聞覺知突出衲僧巴鼻風行草偃水到渠成如太阿
在手凜凜神威誰敢正眼覷著所以諸佛以此出世
祖師以此西來乾坤以此覆載日月星辰以此炤臨
天堂地獄以此而分善惡四聖六凡以此頭出頭沒
衲僧家以此提向上鉗鎚碎聖凡窠臼窠臼若盡直
得上無攀仰下絕已躬常光現前壁立萬仞正與麼
時如何與約齋相見良久云鋒芒影裏分緇素鼻孔
依前搭上唇 復說偈曰居於富貴中不爲富貴誤
赤手挨開解脫門四方八面俱獨步佛祖不知繇惠

誰立本據咄咄力口希聞見覺知齊合掌鐵牛生
得鳳凰兒

上堂舉僧問趙州澄澄絕點時如何州云猶是人家
客作漢師云遮僧置箇問端不妨峻峻爭奈趙州有
起膏肓底手段雖然如是總落在天童手裏畢竟如
何喝一喝下座

上堂十五日已前開池不待月十五日已後池成月
自來正當十五日吹無孔笛唱太平歌佛及衆坐同
聲唱和且超羣拔萃一句作麼生道四海浪平龍驤
穩九天雲靜鶴飛高

聖節上堂日日是好日時時是好時惟有十月二十

二吉星垂炤寂希奇

董景德寺十七世孫開悟

上堂說到行不到好肉剜瘡行到說不到扶籬摸壁
行說俱到石笋抽條行說俱不到擔雪填井離四句
絕百非卽不問諸人且道文殊問不二法門維摩因
什麼默然喝一喝云貪他一粒粟失却半年糧

上堂舉僧問雲門不起一念還有過也無雲門對他
道須彌山師云大小雲門話頭也不識

上堂朝說暮說展演河沙句義不是衲僧分上行事
棒行喝敲床豎拂揚眉瞬目不是衲僧分上事透出

兩重關逗到不疑之地正好朝打三千暮打八百且道過在什麼處欲得不招無間業莫謗如來正法輪

密菴和尚語錄卷下

住明州天童景德寺十七世孫圓悟編

解夏小叅釋迦不說說迦葉不聞聞天河風浪靜星斗位區分與麼與麼有解有結不與麼不與麼無解無結與麼不與麼結中有解不與麼却與麼解中有結忽若總不與麼前不至村後不至店千人萬人攢簇不入如大日輪昇於虛空有眼者見其清淨光明無壞無雜雖居衆色不與一切和合靈覺妙明揀非煅煉當與麼時還著得解結兩字麼還著得佛法兩字麼還著得世法兩字麼還著得是非長短數字麼

撰述
酌然是著不得何故豈不見道般若如大火聚近之則燎却面門又如塗毒鼓搗之則聞者皆喪縱饒三世諸佛六代祖師競出頭來顯大威權出廣長舌橫說豎說盡在光明影裏發現於衲僧分上全無交涉且道衲僧有什麼長處困來曲臂支頭睡不怕人來偷枕頭

復舉雲門問洞山近離甚處山云查渡門云夏在什麼處山云湖南報慈門云幾時離彼山云八月二十五門云放汝三頓棒山至來日却上問訊昨日蒙放三頓棒不知過在什麼處門云飯袋于江西湖南便

與麼商量洞山豁然大悟師云雲門大師放去太奢收來太儉末後慙懃何不與他本分草料致令和泥合水洞山與麼悟去也是杓卜聽虛聲

冬至小叅却物爲上逐物爲下若論戰也箇箇力在轉處古人拈一機示一境無不精徹淵奧廓徹聖凡恰似壯士架千鈞弩百發百中爲他末上著脚手處牢固外物搖撼不動終有成立之節衲僧家出一叢林入一保社多歷年所已躬大事不能發現蓋爲未上著脚手處遲緩坐在腳頭脚尾聽不出聲見不超色如蠶作繭自縈自縛十二時中無片時快樂至竟

終成廢人而今若要直截與生死作頭底無非向一念欲起未起時提起一刀兩斷自然內空外空有爲空無爲空四方八面空索索地覓其空處了不可得到箇裏回頭一覷驀地冷灰裏豆爆如關將軍入大陣拚其性命不見有百萬兵衆當恁麼時如何共語如何湊泊還肯說向人麼秉殺人刀活人劍與一切處爲祥爲瑞爲寃爲害便見頂門上時時一陽來復脚跟下日日萬彙發生撥草瞻風便具緇素眼目秤斤定兩毫髮不差一切處恰恰地天自高地自厚饑饉渴飲一切尋常到遮境界便是一員無事道人方

敢稱爲行脚高士其或未然莫將閑學解埋沒祖師心

復舉祖師道心隨萬境轉轉處實能幽隨流認得性無喜亦無憂師云大小祖師抓頭不知痒處

璨禪人薦考請小叅佛法至妙妙在明心心若洞明前後際斷三祇劫空覓其空處了不可得如紅爐上一點雪相似到箇裏生也生他不得死也死他不得既生死他不得卽無生死可出亦無菩提可求人與非人性相平等全體是箇大解脫門二六時中受用轉轉地出生入死不犯毫釐或去或留全超曠劫

【撰述】
所以道一念普觀無量劫無去無來亦無住如是了
知三世事超諸方便成十力又道生滅去來本如來
藏當處出生隨處滅盡祖師又道起諸善法本是幻
造諸惡業亦是幻身如聚沫心如風幻出無根無實
性從上諸聖盡向生死海中頭出頭沒互相激揚只
要當人直截承當自是諸人不肯回光返照流浪生
死且如山河大地是幻日月星辰是幻明暗色空是
幻四聖六凡是幻山僧說底口中水漉漉地是幻諸
人耳裏聽底寂寂惺惺是幻作麼生說箇幻出底道
理向遮裡揆得一機通拶得一機透在諸佛分上不

增一絲毫在諸人分上不減一絲毫便識得致政承
務出生入死得大自在落處非唯識得承務落處又
且識得璨禪人起一念心爲嚴父追修落處功不浪
施有時恁麼也得有時不恁麼也得有時恁麼不恁
麼總得苟或情存限量墮在聲前句後今夜不免和
泥合水更爲諸人重說偈言山河大地不是幻日月
星辰不是幻明暗色空不是幻四聖六凡不是幻山
僧說底不是幻諸人聽底不是幻恁麼會得便知幻
出底道理分分曉曉地然雖如是且致政承務卽今
在什麼處安身立命良久云日出心光耀明明不覆

藏

復舉祖師道父母非我親師云眼裏耳裏絕纖塵諸佛非我道師云鐵眼銅睛覷不破汝言與心親師云皎子排頭咬鐵釘汝行與道合師云上下四維俱匄匣只將此語報深恩朵朵紅蓮火裏發

小叅盡大地撮來如粟米粒大拋向面前有眼者見有耳者聞要且不是心不是佛不是物不是禪道佛法亦非少室單傳靈利漢聞與麼告報如慣戰良馬聞鑼鼓聲渾身痒簇簇地千人萬人羅籠不住有口說不到有耳聽不聞有眼覷不透三世諸佛仰望不

及六代祖師提掇不起天下老和尚摸索不著一大藏教詮注不及黃面老子得此柄霸入手便道未離兜率已降王宮未出母胎度人已畢達磨大師得箇消息便道單傳心印不立文字直指人心見性成佛爾後一人傳虛萬人傳實互相激揚如天普蓋似地普擎寂寥非內寬廓非外及至德山臨濟出來各道威權行棒行喝傍若無人雪峯韞三毬俱抵豎一指汾州莫妄想玄沙因我得禮你以至從上老凍臙全提半提直是天下無敵正眼觀來於自己本分事大似隔靴抓癢有什麼快活處遮紫出格巴鼻除非當

人自肯知非退步就已脚跟下推勘到詞窮理盡無
告訴處本地風光頓爾現前四大五蘊一時脫落空
索索地如人拾得至寶終不說向人我寶重幾兩值
幾錢明眼漢沒窠臼擬不擬便斬爲三斷 復云記
得先應庵在蔣山時因大慧禪師至陞座舉佛眼和
尚做無爲軍化主路中著跌有箇省處歸來舉似五
祖後在客司因夜坐撥火忽然猛省雖然如是每至
入室未能深入間與從容請益五祖祖云我爲你說
箇喻子正如一人牽一頭牛從窻櫺中過兩角四蹄
俱過了唯有尾巴過不得某自虎丘先師處聞此語

在肚皮裏信知在今天下無人理會得所以密之三
寸今日不因師叔老師到來小姪此生無因拈出敢
問大衆旣是大底過了如何尾巴過不得且道諸訛
在什麼處小姪今日對衆拈出供養師叔大和尚願
與趙州同年爲佛法作大主張使天下衲僧洞徹此
一段奇特大事師乃云先師舉了也是渾崙吞箇棗
至今未有人動著今夜從頭說破也要共知五祖和
尚錯舉先師亦乃錯傳山僧不免將錯就錯驀拈拄
杖卓一下云錯錯空裏磨盤生八角喝一喝擲拄杖

下座

解夏小叅豎起拂子還見麼敲禪床云還聞麼只此見聞非見聞無餘聲色可呈君箇中若了全無事體用何妨分不分古人八字打開了也恁麼見得便見傑上座今夏九十日內入大光明藏中呼喚森羅萬象明暗色空情與無情上至非非想天下至空輪水際一切蠢動含靈盡向拂子頭上安居同時禁足不說佛不說祖不說玄不說妙不守躡人冰不憐鶯護雪只是應時應節不失其宜大盡三十日小盡二十九饑餐渴飲任運騰騰佛界不收魔界不攝直得皇風蕩蕩帝道平平野老謳歌漁人罷唱而今一夏周

畢驅遣各歸所止隨家豐儉長者長法身短者短法身逍遙自在任性方圓而無拘執衆中忽有箇衲僧出來道長老長老我自行脚走徧天下每見善知識小叅普說盡是攢花簇錦結角羅紋說得盛水不漏或大機大用驅耕夫牛奪饑人食呵叱列祖擠排先聖如風雷電卷看者不容眨眼今夜如此提持全無巴鼻全無滋味如蚊子上鐵牛相似直是無下背處也令人疑者到遮裏如何對他卽是棒將去得麼喝將去得麼莫是跳下禪床歸方丈得麼不然別將兩轉新鮮語答將去得麼如斯理論盡是諸方用過底

藥方非但起人膏肓之疾不得益令增他重病既總不與麼如何卽是而今向佛祖說不到處天下老和尚颺下不用底對他非唯對他且要聞者見者蕩盡胸中禪道佛法知見人人如獅子王吒沙地哮吼一聲壁立萬仞若他道使人疑著只對他道大疑之下必有大悟

復舉僧問雲門大師初秋夏末前程忽有人問未審對他道什麼門云大衆退後僧云過在什麼處門云還我九十日飯錢來師云平如鏡面嶮若刀山遮僧有破牢關底機謀雲門善用不戰屈人兵底手段雖

然如是鼻孔在靈隱手裏

歲夜小叅年窮歲盡時或笑或顰眉飽者終日飽饑者終日饑唯有衲僧家不耕而食不蠶而衣孜孜矻矻如愚如癡忽聽忠言逆耳便見心動神疲禪和子禪和子不須疑或去或住總是父母未生時山僧恁麼告報未免鳳林吒之復舉頌云一年三百六十日今宵正是結交頭移身換步無多子六合清風來未休

普說

師初住烏巨普說某自携被入方丈經五十日未會

舉著方丈職無他蓋此間有數人勤舊皆是見前輩大尊宿經大爐鞴中鍛鍊過來故乃縮手此者有數人新發心菩薩到來不免爲他東說西說凡遇掛牌諸勤舊不勞訪及新發心兄弟有長處大家相布施不妨如不來亦無固必若論諸人分上事未入父母胞胎已前淨裸裸地及乎撞入父母胞胎裏也淨裸裸地一旦跳出頭來也淨裸裸地千聖著眼不到萬靈瞻仰無門日往月來不覺不知一念心纔動墮落染淨二緣便見有天堂地獄九有四生有禪道可叅有佛祖可敬有異類可賤如此是是非非紛然於懷

白日間被他使得七顛八倒昧却本地風光本來面目便被三世諸佛瞞了六代祖師瞞了森羅萬象瞞了蠢動含靈瞞了若是箇大丈夫漢冷地回頭一覷驀地如懸崖石裂一番說什麼三世諸佛六代祖師便見三世諸佛說夢六代祖師說夢天下老和尚說夢方見趙州和尚道老僧使得十二時汝等諸人被十二時使看他得底人吐一言半句終是迥別水潦和尚被馬祖攔胸一踏起來便道百千法門無量妙義總向一毫頭上識得根源去雖然如是正好喫鐵棒在德山和尚在蜀中講經論聲壓四川聞南方有

不立文字單傳心印見性成佛之語憤憤不肯載一車疏鈔要來勘一隊魔子始抵澧州龍潭見信和尚便問久嚮龍潭及乎到來潭又不見龍又不現信和尚也不著忙也不行棒也不行喝只徐徐地向他道子親到龍潭此語最毒他雖是箇座主不敢胡撐亂拄便乃休去若是硬主張底只怕口空便輟將去有什麼救處遂從此執侍夜立更深潭云侍者何不去德山挨簾出乃云外面黑龍潭遂點紙燭度與纒擬接潭便吹殺德山便禮拜潭云子見箇什麼道理便禮拜德山云從今已後更不疑天下老和尚舌頭

去也龍潭和尚老婆心太甚若見禮拜便好拽拄杖趕出三門外佛法至今未至掃土旣已放過德山次日便乃撒屎撒尿將一車疏鈔堆在法堂前拈火炬云窮諸玄辯若一毫置於太虛竭世樞機似一滴投於巨壑便燒却後來做盡鬼怪不可盡說若是著實叅禪兄弟且從那裏叅起只向疑不破處橫咬豎咬如咬生鐵楸相似千萬莫教沾著牙齒纔沾著牙齒便了不得驀地失口咬破便見百味具足自己分上如十日並炤不妨快活某平生叅見數人善知識未後方見應菴每見兄弟云在尊宿身邊得箇悟處得

他說話方法嗣他某見應菴先師也無悟處也不會
叅得他禪也不會得他一言半句說話只是被他罵
得身心頑了今日被人推出做長老只據遮罨子與
兄弟評論雖然如是傑上座說底切莫記一字他日
便成蠱毒去也珍重

普說時光如箭急始見結制又過了二十日兄弟自
已事如何一等是拋離父母挑囊負鉢踏破草鞋直
須硬着脊梁窮究教徹頭徹尾去莫只半青半黃似
有似無向長連床上閉眉合眼不是冥然無知直是
惺惺歷歷上不見有諸佛可仰下不見有衆生可度

中不見有自己可愛只覺肚裏熱開闔地快活無比
點自點頭以謂天下無雙才跳下床都不見了被人
把斷咽喉推勘又却去不得何故只爲不曾親證親
悟乃是暫息塵緣認得眼前罨子光景以爲究竟此
病最苦所以雲門道光不透脫有兩般病一切處不
明面前有物是一又透得法空隱隱地似有箇物相
似亦是光不透脫又法身亦有兩般病爲法執不忘
已見猶存坐在法身邊是一直饒透得法身去放過
則不可子細簡點將來有什麼氣息亦是病雲門大
師向人著手脚不及處痛下一錐也只要諸人回頭

撰述
轉腦若是親證親悟大法明底人說什麼把斷咽喉
渠自有超宗異目生涯開眼時也只恁麼湛湛地閉
眼時也只恁麼湛湛地上刀山攀劔樹也只恁麼湛
湛地上三十三天也只恁麼湛湛地與平常人初無
二樣不作許多般鬼怪只是肚裏迥別等閑被人挨
拶著便如火星迸散又如水上按葫蘆相似轉轉轉
地誰能攔截得住到遮境界三世諸佛也覩不破生
死魔軍向甚處摸捺迷悟向甚處栖泊是非向甚處
搖撼通上徹下淨裸裸地赤灑灑地全體是箇當人
受用大解脫門佛法世法打成一片有時拈一莖草

作丈六金身有時將丈六金身作一莖草舒卷自在
縱奪臨時別無他術只爲親證親悟了達三祇劫空
不被諸塵所轉而今兄弟未到遮般田地硬將山河
大地明暗色空情與無情差排要歸自己豈非大錯
見人下拍渠也拍見人下喝渠也喝不道你底不是
輕輕從脚跟下勘又却不知落處只成脫空業識忒
忒無本可據深可痛哉逗到孤燈獨焰時一點氣落
上一點氣落下面前黑似漆求死不得求生不得當
此之時悔將何及莫言不道所以道叅須實叅悟須
實悟闍羅大王不怕多語兄弟旣來此深山窮谷中

相聚傑上座遮裏也無禪到你叅也無道到你學也無錢到你使也無好食到你喫也不會順摩捋你只有劈胸一拳你若叅得透盡未來際受用無盡若叅不透定向背地裏商量此箇拳頭如漫天網子相似只要諸人跳得出如斯理論有什麼交涉每見兄弟來室中下語多在六根門頭著到脚步窄狹今夜一等是入泥入水據平生管見舉似大眾昔行脚時入一尊宿室乃問香巖上樹如何對云只見錐頭利不見鑿頭方又云上座因什麼喪身失命對云某甲今日到退三千里問云此是樹上語樹下語對云杜撰

長老如麻似粟聲未絕尊宿便打某甲接住云未在更道尊宿大笑次見尊宿乃豎起拂子云山河大地明暗色空總在拂子頭上對云三千里外賺我來宿拂一拂云酌然酌然某甲把住拂云和尚離却拂子別道尊宿笑云是拂子作麼生離某甲乃倒拂一拂便出次日入室乃問云天人羣生類皆有箇歡喜處某甲手進前云某甲也無歡喜處宿云上座爲什麼入門便笑某甲乃指云看遮老和尚當面敗闕宿便掌某甲乃笑宿云草賊大敗某便出看來此尊宿下刃遲了若是傑上座見他叉手進前某甲也無歡喜

處便與劈胸一拳待他擬開口再與一拳雖然如是
也要諸人簡點又見一尊宿乃問如何是聖諦第一
義對云一對草鞋三隻子宿云猶是第二義對云老
人大大誑惑人男女有甚了期宿大笑對云和尚恁
麼爲人闍老面前喫鐵棒有日在更有多多葛藤不
欲盡說平生敗闕盡情抖擻了也夜深久立

頌贊

德山托鉢

斫却月中桂清光轉更多狐狸俱屏迹獅子奮金毛
狗子無佛性

狗子無佛性殺人便償命楚痛百千般因邪却打正
女子出定

出得何如未出時瞎驢成隊喪全機而今四海平如
砥蘆管迎風撩亂吹

趙州洗鉢孟

粥了令教洗鉢孟鐵船無底要人扶片帆高掛乘風
便截海須還大丈夫

臨濟三頓棒

一頓渾家盡滅門更加兩頓累兒孫銀山鐵壁俱穿
透萬里無雲宇宙分

百丈野狐

五百生前失却五百生後太錯錯錯誰道祥麟只一角

一口吸盡西江水

西江一吸了無餘突出堂堂大丈夫盡道世間胡鬚
赤須知更有赤胡鬚

卽心卽佛

大海波濤濶千峯氣象雄古今無間斷南北路頭通
趙州勘婆

天高地厚人難見海濶山遙只自知勘破却回休借

問得便宜處落便宜

師因應庵一日喝恭上座云你常在此作什麼
恭煩惱打併起單師聞乃成頌寄之

百戰場中舞纛旗將軍立處十分危遊人只看錐頭
利失却吹毛總不知

僧問屋裏販揚州時如何師以頌答之

屋裏販揚州水深山更幽終年無客到明月自相投
贊布袋和尚

禪不叅道不會終日怵怵弄箇布袋十字街頭道等
人阿誰知渠綵纈稽首彌勒世尊國有憲章三千條

罪

贊開明禪師

江郎入定烏巨開山林深路迥火冷雲寒道大不知誰辯的 帝王親手付金襴

贊繡寶公

針鋒上直入線縫裏跳出剪刀尺子自隨身號令乾坤齊萬物

贊大慧和尚

敲瞎頂門三隻眼是非佛法一齊割竹篋頭上放無端正是徐六擔片板

贊應庵和尚

眼大如環頭匾似扇從來不省已非偏笑漳泉福建著實處用無七縱八橫脫空時日有萬化千變焚香稽首讚揚也是神頭鬼面

贊木庵和尚

面目森嚴語言希差不出飛猿嶺道聲藹天下活潑庵不傳之宗死衲僧虛頭話霸五坐道場叢林增價稽首拜手虛空貼卦

贊徑山音首座

氣宇雲閑身心木槁頂門正眼紅日杲杲早投長蘆

刻草之機晚分雙徑人天之座名山屢招而不赴一
庵超然其高臥夫是謂叢林前輩典刑宜與趙州同
年而並操者也

約齋張直閣畫師頂相請贊

挨開不二門千聖須却步直下便承當畧通一線路
佛也不奈何誰敢當頭道道著頭角生一點黑如皂
盡情分付約齋大居士一等人間任揚播

真際道人請贊

孟叅議恭人

一句全提了無向背臨濟正宗恣意破碎彌天過犯
不容懺悔丹青畫出向人前他家自有通人愛

禪人請贊

五戒不持威儀破盡空腹高心言不足信徒將朽木
亂塗糊衲僧添得膏肓病

天無私蓋地無私載如何形容生此竒怪爲僧不稟
僧儀學佛力破佛戒鼓舌搖唇叢林殃害若無伽梨
裹渾身便是當年屈突蓋

在家不讀書行脚不叅禪隨流閑打闕掘地覓青天
而今老矣方知悔担人痛處力加鞭
眼橫鼻直村僧肚裏渾無一窖兩奉 詔旨住持添
得叢林熱鬧若論直指單傳正是瞌夢未覺

入室愛用拳頭佛來也不放過知他是聖是凡便敢
如此亂做識得破海壇馬子似驢大

德山臨濟棒喝交馳雲門顧鑑總是愚癡唯有徑山
無伎倆握拳端坐眼如眉

水裏染成恰似真箇據坐胡床胡揮亂做三十年後
此話大行籍沒乃翁膠黏滯貨

佛日常長老請贊

赤手全提金圈栗棘跳出三要三玄破蕩佛祖窠窟
試問有何神通盡力吐露不出咄咄佛日長老與麼
拈出

隆報著長老請贊

據虎頭收虎尾第一句下明宗旨了無禪道與人叅
滴水便見波瀾起大醒醒難比擬分付隆報著長老
好向叢林振網紀

偈頌

皇太子妃請就徑山陞座末後說偈

佛身無爲不墮諸數隨機示現應無所住如月行空
光炤寰宇廓徹信心莊嚴福聚記得先賢曾有言皇
天無親唯德是輔

張直閣請陞座末後說偈

一句全提法界寬大千收拾掌中觀橫該豎抹超三際
迎葉徒勞強破顏

贈閻清黃釋褐初赴上庠

驀劄相逢笑臉開也知平地起風雷好將一滴梅溪水
爲雨爲霖遍九垓

和無著贊大慧齒髮舍利

背觸全提話已圓孤峯凜凜播皇天無端更把閑毛齒
惹得叢林口耳傳

送昂維那出嶺兼呈應庵

福城得得來相訪象骨巖前話別時驚起石人開鐵

眼倚筇遙聽老猿啼

雲黃山下老禪魔凌蔑宗風罪過多君若到門深問
訊看渠伎倆復如何

送拙庵住洪福

瞎驢生得瞎驢兒齷齪聲名徹四維更把少林無孔
笛逢人應是逆風吹

送先知客

萬里南來川霧直奔流度及扣玄關頂門截瞎金剛
眼去住還同珠走盤

送璘首座住定水

一棒一條痕一摑一掌血不是向上機關亦非單傳
妙訣佛祖見之攢眉魔外聞之膽折建立此綱宗當
陽貴直截璘待吾十年氣宇迥超絕信手斫方圓初
不泥唇舌青天霹靂轟風雲會時節行看定水起波
濤始信來源出處高

送恢侍者

戴角擎頭與麼來當機一拶頂門開行行勿謂無知
已闔外威權善自裁

送雪峯化主

手把庵門便放憨千鈞重擔要人擔寥寥坐斷孤峯

頂雲衲相從晝夜叅

和壁書記

擲劍揮空不住空空輪無跡劒無鋒無鋒無跡憑誰
會會得金沙墮眼中

送珣禪人還海壇

家鄉到日許誰知默默相逢絕路岐莫謂海門風浪
惡干戈元是太平基

送慧知客還蜀

踏破劒門關十方無壁落信步復南來將錯還就錯
霜風刮面寒梅梢初破萼去去又何言寧負孤雲約

示智悟道人

智悟悟自心不在一切處回首時觀瞻便是佛國土

示善應道人

善應無私當陽有準直下承當入佛祖闢

徑山茶湯會首求頌二首

徑山大施門開長者慳貪俱破烹煎鳳髓龍團供養
千箇萬箇若作佛法商量和我一狀領過

有智大丈夫發心貴真實心眞萬法空處處無蹤跡
所謂大空王顯不思議力况復念世間來者正疲極
一茶一湯功德香普令信者從茲入

示曾秘較

天童得力句不搔三寸舌父母未生前令已行摩竭
直下便承當敢保猶未徹放下百不知腦門重着楔
唯是過量人一舉無二說

祥符建僧堂周都料求頌

妙處如何論淺深應之於手得於心方圓不用機謀
力長短休將語默尋一斧便成真話計三思始就費
光陰山僧直截重重說須信眞鑰不博金

法語

示易禪人

祖師門下直截省要不歷階梯立地成佛學道人多不明此病在於何只爲太煞現成不肯承當一味鑽頭入知見網中覓佛覓法覓玄覓妙向上向下如何若彼恰如蒼蠅墮在糲盤中粘手綴脚自作辛苦看他臨濟在黃檗會裡三年白日只堆堆地坐全不知佛法道理首座勉令問佛法的的大意三問三遭六十拄杖後到大愚灘頭驀自知非便是元來黃檗佛法無多子遮般說話豈是心機意識預先安排而能致之然耶復返黃檗見來乃曰遮漢來來去去有甚了期濟曰只爲老婆心切檗曰大愚老漢饒舌待

來痛與一頓濟云說什麼待來卽今便喫隨後便掌檗曰遮風顛漢却來遮裡捋虎鬚濟便喝叅學人須得一番如此方可入作亦未爲究竟從上有力量大人終不肯容易小小了却纔得遮般柄擲入手直是撥草瞻風覓箇咬猪狗惡手段與他做冤家眉毛厮結禁得惡拳踢喫得沒滋味大爐鞴中千煅萬煉徹底淨盡跳得出無絲毫領覽超情離見尚恐走作銅鑿人家男女安肯向平白地折合却信知先達拈一機示一境盡是脫羅籠沒窠臼曾無針鋒許與人作道理豈不綽綽然有餘裕哉

撰述
卷之二
示道禪人

先達抱道之士巖居穴處未曾容易以一言半句急於人知日久歲深蘊藉成熟人自知之便乃暴糧躡足而就扣問生死已躬大事抑不得已畧露鋒鏃何啻青天轟霹靂只要當人於聲前領畧得一箇半箇擔荷得行便解據虎頭收虎尾爲如來種草豈可胡亂朝呪暮呪而欲使之然耶年來此道大不振者無他蓋爲人師者眼腦不正當自無見處但以名利得失居懷深怕人道他無機緣晝三夜三於古人方冊中顛倒熟念釀在第八識田中准擬學者來問貴圖

口不空恰如羊屙屎纔豎起尾巴便有百千顆落地學者眼目不明如何辨白盡情深信一言引衆盲相牽入火坑所謂打初不遇作家到底翻成骨董若是達磨兒孫決欲洞明祖翁家裏事直須一刀兩段肚裏無一絲毫繫念處只就無繫念處看箇話頭六祖示明上座道不思善不思惡正恁麼時如何是明上座父母未生前本來面目但如此看來看去看到詞窮理盡沒奈何處驀然看透便是一生叅學事畢

示光禪人

馬祖道卽心卽佛非心非佛不是心不是佛不是物

與麼揭示學者恰如掘箇深坑活埋了人却向上面
奠祭也德山一條白棒佛來也打祖來也打又道三
十年來未曾打著箇獨脫底何曾夢見達磨未來時
汗臭氣在衲僧家十二時中行住坐臥如火燒冰莫
誇少壯休論老成一處錯踏翻千處百處一時透如
獅子王吒沙地哮吼一聲壁立萬仞豈不慶快平生
當人幸有如是威光幸有如是受用不肯回頭自覷
捕多是坐在他人語默裏及至終身無所成立若要
易會不必泥在三條椽下但向逆順堆中顛撲不破
自覺省方便是破家散宅時節至矣

示覺禪人

蘊扶宗豎教英氣本色行脚道流不在遊州獵縣觀
境致過時務要與生死兩字作頭底直截荷負跳出
斷常窠臼識得祖父田園落著收拾契券一分曉
不被他人侵疆犯界然後見佛殺佛見祖殺祖破盡
上祖生涯都無顧藉著弊垢衣入羣魔隊中靡所不
爲仰不愧天俯不愧人顛顛頂頂大棒打不回頭千
人萬人羅籠不住一旦業緣成就被人推出向曲录
床上胡言漢語欺賢罔聖世人說不到處一一說出
世人做不到處一一做出傍觀者爲他面熱汗下渠

只閑閑地神色儼然到者般田地亦未稱扶豎正宗
意氣何況末上被邪師引入草窠裏以沙糖蜜湯甜
其舌頭纔有夢兒黃連氣味便自忌諱如此永爲廢
人學道至要別無他術須是硬靠却咬猪狗手段喫
得沒滋味禁得惡錡錐千煨萬煉胸次淨裸裸地全
無佛法道理但恁麼研究如人學射久久自然中的
誠不誣矣

示應禪人

昔世尊在靈山會上百萬衆前拈起一枝花獨迦葉
尊者一人破顏微笑世尊便云吾有正法眼藏涅槃

妙心分付摩訶大迦葉劈頭一錯直至今代代相
傳分宗列派承虛接響實爲世尊有禪道佛法可分
付與人末學紛紛不本其繇拋家失業踰嶺辛苦奔
南走北向諸方老和尚舌頭上覓禪覓道覓佛覓法
將心等他分付殊不知劍去久矣方乃刻舟若是大
丈夫漢皮下有血終不喫別人殘羹餽飯直下自家
豎起脊梁如銀山鐵壁相似於一切善惡逆順境界
中搖撼不動二六時中默默地回光返照冷眼覷捕
驀然覷透父母未生已前本來面目脫體虛凝湛然
常寂盡大地都盧是箇解脫門到此境界暗裏點頭

撰述
白肯已謂世出世間無第二人豈知正是墮在解脫
深坑無生法窟又謂之黑山下恰似魂不散底死人
守定老鼠三寸眼光以爲究竟極則如此見解有什
麼快活處若真踏著不疑之地曾經本色大爐鞴中
煅煉出來如金翅孽海如猛虎插翼豈有許多栖泊
處白日只閑閑地要用便用信手拈來端是懸崖石
裂誰能禁止之耶是故普化和尚每於街頭道明頭
來明頭打暗頭來暗頭打四方八面來旋風打虛空
來連架打臨濟令侍者扭住云總不與麼時如何化
云明日大悲院裏有齋所謂如人善射箭不虛發臨

濟雖則坐籌帷幄決勝千里侍者撞入重圍幾乎收
身不上普化縱饒八面受敵要且無佛法身心烏巨
若更切勿定招拔舌地獄

示白雲然長老

佛祖闡域衲僧巴鼻如火聚無一針鋒許與人作
道理湊泊只貴當人具逸羣氣槩直截荷負譬如真
獅子王哮吼一聲壁立萬仞始見不孤從上爪牙也
靈山拈花已前少林直指之後繩繩相繼如鏡照像
毫髮無差皆是夙承願力提持遮一着子非獨與天
下人抽釘拔楔至於九有四生俾令洞徹正知正見

是爲大丈夫成就大丈夫事

神光不昧萬古微猷只此靈鋒阿誰敢擬大凡超宗之事垂手爲人等開示一機一境快如倚天長劍相似直下取人命根了無異轍終不向平地上與人和泥合水巖頭謂一一從自己胸襟流出蓋天蓋地豈虛語哉

示哲珉二禪人幹帳

有祖已來未嘗容易以禪道佛法指示學者謂之學道捷徑只要當人去却今時向父母未生已前混沌未分之際直截擔荷如龍得水似虎靠山一切處澄

澄湛湛一切處生殺自繇一切處自能生風起草不着有爲不坐無爲如斬一縵緣一斬一切斬如染一縵緣一染一切染通上徹下全體是箇大解脫門佛法世法打成一片何處有一絲毫許外物爲之障礙學道人力學而不悟者病在泥於古人言句處病在坐着勝妙境界處病在空洞無象處病在以禪道佛法居懷處病在却迷就悟處病在最初不遇善知識引入葛藤窠裡處此數病非但初機晚進有之從上大尊宿悟徹本心見徹本性自己本地風光現前大法不明亦有此病看他興化和尚爲衆曰我聞前廊

也喝後架也喝諸子莫言喝亂喝直饒喝得興化上
三十三天撲下來一點氣息也無待興化甦省起來
向汝道未在何故我未曾向紫羅帳裏撒真珠與你
去在興化直截擔荷騎賊馬趕賊只是未得勦絕前
途撞着知音分明舉似必爲圓却遮話

示源監寺

源監寺余俗門兄弟也未出父母胞胎已前雖然各
不知其名字爲誰便乃以法義相資如水入水及其
出父母胞胎以至長成捨家出家圓頂方服出叢林
入保社見善知識敦其法義分其皂白絲毫不差余

業緣所鍾備員深山古寺不遠千里而來以道相聚
日久歲深爲左右臂戮力贊成益見法義昭著厚矣
予年來老景侵尋方且乞閑偶來告別曰蘿庵師伯
那塔雖成四面牆壘未就恐牛羊踐蹂於義不便欲
往謁諸檀越一等圓備余嘉其法義愈堅金石故不
敢留昔肅宗帝問忠國師百年後所須何物國師云
爲老僧造箇無縫塔帝云請師塔樣國師良久云會
麼帝云不會國師云吾有侍者耽源却諳此事請詔
問之國師遷化後帝詔耽源問之云相之南潭之北
中有黃金克一國無影樹下合貝船琉璃殿上無知

識嘎國師好箇塔樣被耽源一欠釘翻却了也直得
七穿八穴描也描不成畫也畫不就遂成叢林話霸
且畢竟喚那箇作國師塔樣有般瞻漢便道卽此良
久處更引外道問佛世尊良久以爲證據若如此何
異盲人摸象要見國師塔樣遠之遠矣前途有問源
監寺師伯無縫塔樣如何對他急著精彩下取一轉

密菴和尚語錄卷下終

古秀州弟子通勝孫洪基捐資刻密菴語錄卷
上下計字三萬零八百該銀十五兩四錢
崇禎己卯佛浴日識
板存本郡楞嚴寺

七十五

9
170
1
2
3
4
5
6
7
8
9
180
1
2
3
4
5
6
7
8
9
190
1
2
3
4
5
6
7
8